

翁山詩外

CHINESE-JAPANESE LIBRARY
HARVARD-YENCHING INSTITUTE
AT HARVARD UNIVERSITY


OCT 1951

12

T 5460/72443

共
十
二
卷

十
二
世



翁山詩外

卷之十五

番禺



雜體一

上瀧謠 四解

寧上三峽莫上六瀧上瀧猶可下瀧殺我 船隨
 飛流入于瀧湫十尺之勢十沉一浮 篙直如箭
 船石不見篙曲如弓船石相舂 上瀧船單下瀧
 船雙六瀧可過一石不容

上灘謠 三解

一灘一尺十灘一丈高高不窮灘在天上 朝上
 烏蠻暮上烏蠻一灘十日我髮將斑 婦人撐右

丈夫撐左估客笑人眠篙不可

舟子謠 四解

廣州大艨艟使得兩頭風輸一篷贏一篷 後八
字風揚篷當中前八字風勾篷西東 上灘如天
鐵人紙船人與石鬪十鈎一牽船隨石轉其軟如
綿 江海無津鐵船紙人隨風所督萬斛埃塵其
船堅重鐵力為身

上三峽謠

潮上飛來一宿即迴飛來潮上二禺皆響

自英德下峽者先湏陽自清遠上峽者先中

宿歌曰

湏陽頭中宿尾中央一峽香鑪是
頭中宿尾湏陽香鑪一峽是中央

英德灘謠

舟上龍頭一沉一浮舟上鼈背一進一退

磨刀灘謠

石為刀舟為礪朝磨暮磨人與之敝
舟石相磨舟柰石何

彈子磯謠

一篙一尺十篙一丈不怕彈子磯高高在天上
上水船撐得鐵牆穿下水舟搖得鐵牆浮

望夫操 有序

中宿峽中有望夫臺亦曰望夫山予爲琴操以
擬楊廉夫石婦操云

望夫臺儂今化爲石郎且不須迴
望夫山儂雖化爲石猶自待郎還

雷女織葛歌

雷女采葛緝作葛絲東家爲絺西家爲絺夫寒衣
葛布婦饑食葛乳得錢雖則多不足償租賦一日
織一疋十指徒苦辛祇以肥商賈無能養一身

楓人歌

小雨楓人長一尺大雨楓人長一丈女巫取得沉
水薰一夕楓人有精爽大婦持珠來求子步遲迴

小婦持錢至問郎歸尚未

留人石詛祝辭

有序

自橫州伶俐水口以上江之南岸有一石狀若
女子號留人石諺曰廣西有一留人石廣東有
一望夫山是也廣東商賈多贅於廣西不返其
婦女輒以此石能留人西望詛祝予代爲之辭
詛曰

留人石莫留人風吹石化爲塵

祝曰

留人石既爲塵望夫石復爲人

浮丘謠

浮丘叔浮丘丈人同一目撒豆成金人不知肩上
珊瑚檐一束

花燕謠 有序

雷州西湖每夜有紫燕數萬宿荷花中人呼爲
花燕

燕燕飛入荷花尋不見荷花落盡燕無依歸去
猶銜紅一片明年花發莫東西還向荷花深處栖
人間不似荷花好莫使空梁有燕泥

合歡詞

郎種合歡花儂種合歡菜菜好爲儂餐花好爲郎
戴天生菜與花來作合歡配合歡復合歡花菜長

相愛

白蜺謠

南風起落蜺子生於霧成於水北風瘦南風肥厚
至丈取不稀殷勤祭沙渾莫使蜺子飛

連州灘謠

五里一峽十里一灘水如箭激石似弓彎
苦湟水灘難

食魚謠

鮭魚頭鯉魚尾鱧魚之腹更甘旨

水鱸土鯽病人宜食鱸浮鯽沉可以滋陰

黃白二花 黃花魚白 味勝南嘉

寒鱸熟鱸既甘且腴
霜鱸雪螺味不在多

漁者歌

取魚大濫二濫捕鱸三沙四沙潮落不歸村舍月
明同宿蘆花

船公上檣望魚船姥下水牽網滿籃白飯黃花皆魚名
換酒洲邊相餉

悲幽操

昊天嗟嗟兮何今其盲晝不見日兮吾無以爲光
夜不見月兮吾無以爲明昊天嗟嗟兮吾無日月
之照臨將與鬼怪而爭行長跪兮扶桑稽首兮東

皇願將日兮出東方有日兮自有月太陰兮白隨
太陽

割股操

爲母割股母啖而甘母則不苦母啖不甘兒將以
肉爲脯兒肉幸鮮兒心則腐一死可救母兮兒身
以之一嚙之肉兒安忍辭

二妃操有序

二妃者一曰益陽王妃丁亥春王被害廣州妃
有殊色蕃兵欲逼妻之妃曰王故夫也亟具棺
衿殮王予將盡一哀以事汝兵從之妃多縛小
刀衣中整刃外向喪服哭泣視殮含既葬兵欲

犯妃妃大罵兵抱持益急身數十處被創血涔涔仆地妃乃反刃自殺

爲我殮王送之北邙誓將從汝不惜新喪王魄已歸土同穴終何補利刃懷滿身欲切奴爲脯奴血何淋漓痛楚莫予侮自剄以報王黃泉相鼓舞

一曰滋陽王妃王嘗與銅陵興化永豐信陽永寧五王客寓惠州庚寅夏六月廣州圍急有奉化伯黃應傑者與副使李士璉誘執王及五王以惠州先降旣而悉殺之以媚敵諸王子在襁褓及宗室女已嫁者皆死滋陽王旣薨妃某氏色美應傑將辱犯之不從羸其上衣閉室中妃乘間析下衣爲縷經死

夫爲王妃是我皎如霜身可裸何必衣與裳禮義爲包裹天留一縷絲以爲絕命資徒勞強暴守蟬蛻不曾知

四孝烈操

有序

歲甲午西寧王帥師攻新會城閉八閱月糧旣盡守將屠居人以食有莫氏者諸生林應雒之妻其姑將就烹莫叩頭請代姑得釋而莫死有李氏者兵欲食其夫哭拜曰吾夫五十無子請食我兵殺之以首還其夫使葬焉梁氏女者其父諸生名學謙女年十一請代父亦死諸生吳

師讓妻黃氏亦代夫死是為新會四孝烈
黑雲沉沉壓城隅城中食盡雀鼠無誰其死守右
骨都饑來膾人為朝餽可憐窈窕三羅敷肌如冰
雪顏如茶再拜乞克君庖廚解救請代姑與夫妾
年尚少甘且脆姑與夫老肉不如請君先割妾膏
腴味香不負君刀爰食之若厭飫願還妾頭願姑
老夫無子妾命敢踟躕有女年十餘緹縈亦不殊
哀求赴湯鑊保父千金軀保父千金軀泉下報章
渠無嫌女身小一飽只須臾須臾飽亦可章渠單
殺我天生嬌女身為君供鼎俎

三湧操 有序

香山小欖鄉有諸生黃肇揚者其妻麥癸巳冬
被掠憤罵赴水兵捉其髮繫樓櫓間麥乘間斷
髮又赴水身沒復湧出作憤罵狀兵射之既帶
矢沉又湧出兵又射如是者三乃死
入水不肯沉罵奴猶未畢身輕乘文魚三躍江中
出佳人一赫怒波濤為羨溢饒箭雖紛紛難損芝
蘭質去為湘妃姊魂烈知無匹

三烈魂操 有序

三烈魂者一曰韓氏女初廣州有周生者市得
一丹縠衣置於牀側夜將寢寒帷忽見少女驚
問之女曰毋近我非人也生懼趨出比曉率閭

里來觀初聞其聲嬌啼幽怨若近若遠久之形
漸見妾首綽約陰氣籠之若在輕塵謂觀者曰
妾乃博羅韓氏處女也城陷被執賊見犯不從
觸刃而死衣平生所著故魂附而來耳衆乃火
其衣而祭之予聞哀之以辭曰

彼綃者衣兮水之不能濡美人之血紅如荼兮彼
衣者綃兮火之不能燠美人之心皎如雪兮毋留
我綃兮吾魂與之而東飄兮毋留我衣兮吾魂與
之而西飛兮噫嘻烈兮不自言之而誰之知兮

一曰湛氏女年及笄許字吳生丙戌廣州不守
女投井死生欲迎其喪歸族人不許有李氏子

者持正論告生生乃得迎其喪一夕月明李氏
子見一好女身被濕衣前拜曰妾增城湛氏女
父字翼卿非君執議游魂將無所依請賦詩以
志妾之死言畢而滅予聞撫琴爲之操曰

嗚呼噫嘻井之陰陰兮美人以其魂嫁猶不沉兮
匪一日之沉兮何以得君子百年之心兮謝君之
友兮以禮而合幽明之瑟琴兮

一曰蘇氏婦歲甲寅廣州有請覘仙者有自署
蘇氏者來問其誰書曰妾廣州繡花街人父字
明宇妾年十七爲汪季子妻庚寅城破奴殺以婦
凡擊奴奴破額因磔我死歌曰

擊奴擊奴奴雖不死已碎顱腦血可以濺吾夫織
織女手有霹靂泰山難與秋毫敵丈夫何必是荆
軻死爲鬼雄隨所擊

雙刃操

有序

有謝氏婦者番禺市橋人小名玉華同邑曹世
興之妻也世興卒謝氏誓不再嫁爲其父所逼
以刀自刎家人亟救之謝氏左手探喉右手引
刀再割而瞑凡二日不仆色如玉理其裝篋則
殯殮之衣皆具乃與世興合葬焉有某氏者南
海蘭石人夫梁庚寅冬聞城將陷某氏誓決一
死其夫曰卿死吾亦不忍獨生某氏因取二小

刀一與夫一自佩久之兵至蘭石其夫被殺某
氏殮夫旣畢卽取所佩刀自割姑驚哭視其喉
未斷欲取奇藥敷之某氏亟再割以死二事相
類予合而以琴寫之

吁嗟烈兮佳人知義兮不知有身手持喉兮再割
血灑地兮紛紛血灑地兮紛紛夜有光兮非青燐
鬼伯抱持兮叩天閭

待舟操

有序

南海有某氏女者其父以許何氏之僕已而何
氏以構訟破家因取所聘金於女父女父還金
將以其女改字女陰使人語僕謂必無他志且

速之再納聘金僕貧倉卒未具會有以多金求
女者女哭誓不從已而何氏僕持聘金至女父
怒而逐之女乃潛出與僕相持痛哭約僕以舟
來迎至夜女至江干待舟不至卽自經年十有
五予以琴寫其悲辭曰

月將落兮潮水平舟不來兮傷予情獨立沙洲兮
涕淚零無人知兮惟流螢水禽忽叫兮似人聲追
者至兮天欲明君豈忘兮不來迎妾若還兮亦不
生掛榕枝兮心戰栗裙帶斷兮泥沒膝魂尋舟兮
不見舟魂見舟兮妾願畢舟迎魂兮更莫遲波濤
驚兮魂恐失

黃鵠操

有序

予有姬人陳氏從予遠遊道病死於漢陽未三
月其所生之子阿遂行至舊京亦死年甫三齡
臨危泣喚曰姨姨舍我予痛甚援琴爲操以寫
其哀名曰黃鵠以擬古之別鵠辭云

黃鵠死不留雛母在荊江子在吳魂來將子入黃
壚吁嗟乎黃鵠爾何愚留子與雄雄不孤雄不孤
兮爾魂長依吾

前黃鵠兮不留女後黃鵠兮不留子同是嬰孩未
有知泉臺相伴徒爲爾女有魄兮子有魂安得長
隨黃鵠身吁嗟兮黃鵠恐汝復爲人

先是王孺人
攀姜沒其女

年四歲亦繼
亡故及之

後黃鵠操有序

辛酉夏予長兒桂以患痢而沒其母故黎氏孺
人綠眉也綠眉生有美才能詩年長擇耦不嫁
率姜既沒予以禮求爲繼室事吾母夫人備極
色養和柔端靜吾母以爲賢沒後而阿桂鞠育
於吾母年及七齡從予自楚至吳往返數千餘
里能言其山川風土讀書歌詩作吳儂語音綿
蠻清婉以媚其祖母祖母憐愛有加於諸孫方
以爲晨昏娛笑之具皇天降毒一日又使天殤
死其身以死其母綠眉也嗚呼痛哉至是而綠

眉真死矣昔也率姜亡而其女阿雁從之繼也
姬人陳氏亡其子阿遂亦從之今阿桂也於患
難流離十死一生之餘又復追從其母綠眉於
六年之前也嗚呼母終而其子皆旋亡豈皆以
予爲不德而不能有其子乎予自姬人陳沒嘗
爲黃鵠之操以寫其悲今而又不能已於過情
也亦姑援琴爲後黃鵠之操云爾

黃鵠兮汝本鳳凰毛羽麗兮多文章慕高義兮不
字盛年處兮閨房天作合兮咫尺忽與予兮頡頏
初筮得兮歸妹予亦憂兮承筐宜無實兮有實果
生子兮月望甫三齡兮恃失大母育兮無傷於爾

甘兮一味食必同兮膏薌夢當門兮桂樹子碩大
兮珠光以嘉名兮錫汝將見德兮芬芳幸黃鵠兮
遺汝命已勝兮率姜歲殷勤兮祭祀將邀福兮泉
壤魂有知兮成立魂無知兮天殤嗚呼兮黃鵠有
子兮汝猶不沒無子兮今汝其亡嗚呼有子無子
兮維予其皆不能忘

三黃鵠堂操

有序

予族中有女未嫁而其婿莫生死奔喪不返誓
于天以死守志其兩代姑亦皆早孀無子賴女
以養予既爲柏舟說以示女復題其堂曰三黃
鵠堂以比古之陶嬰而爲琴操以寫其悲云

老黃鵠兮太姑與姑年皆耄兮無子與娛少黃鵠
今年始雛未成婦兮代子爲烏烏朝友哺兮堂上
暮滴酒兮黃壚老黃鵠兮不幸兩早寡兮無夫賴
少黃鵠兮以未亡命寄手瓜兮織素爲舖噫吁嘻
門以內兮黃鵠乃有三兮何幸皇天兮仁物何黃
鵠兮偏孤

光福山中鼓琴爲曾仲子作操

上豈無天非君之天兮下豈無地非君之地兮君
之天兮在山之中金庭兮玉柱日月兮所通君之
地兮在水之內笠澤兮具區雷風兮所載雷以生
日風以生月君之心兮一日而盈一月而闕月以

成風日以成雷君之心兮一風而闔一雷而開君
今兮五十功名兮汲汲王貌兮未衰日猶兮點漆
天命兮當知年光兮勿失

結交操

吁嗟嗟我之與子交兮子如日兮月如我未望兮
而日在其右既望兮而日在其左左與右兮其皆
遡日以爲明離日須臾兮月誠不可日以月爲其
命兮日得月而天下有水月以日爲性兮月得日
而天下有火兩相濟兮以長生與天地兮不墮

四雛操

嗟四雛兮二男二女咸嬰孩兮無知未委兮其虎
與鼠朝無食兮酸啼數顧視兮筐筥爲廉士兮不
仁吾過高兮累汝彼墨台之殉潔兮亦薇英之獨
茹豈妻孥而同餓兮爲西山之士苴吁嗟乎膏梁
吾不知求兮文繡吾不知與徒著書兮滿家不能
易兮一肥羜既遭時兮不祥分吾生兮終窶熬文
章兮爲糜是吾心兮所組化呱呱兮爲蠹魚飽六
泣兮困窮天地豈吾兮公姥彼鴟鴞兮肆虐將切
鸞皇兮爲脯返巖穴兮深潛與骨肉兮爲土已矣
乎孔雀愛其珠尾兮山雞惜其文羽寧網羅之見
懼兮不忍濡夫微雨

三疊泉操 有序

天下名山惟匡廬瀑布爲多若黃巖之布水鶴
鳴峰之馬尾水歸宗之玉簾泉康王谷之谷簾
泉九峰菴之馬尾水石門澗臥龍菴之飛泉凡
十有餘處皆奇瀑布也而三疊泉者昔人稱其
上級如飄雲拖練中級如碎玉摧冰下級如玉
龍走潭架空霆擊吾尤以爲匡廬之絕景云泉
下注於潭潭有大磐石予嘗坐嘯其上爰作一
亭於南崖以與泉相向名曰三疊泉亭又書太
白海風吹不斷江月照還空之句以爲亭聯按
山志稱三疊泉乃朱文公所闢文公初見此泉

嘗繪爲圖傳京師所謂五老新瀑者是也彼夫
唐人若太白飛流直下曲江日照虹蜺與僧齊
已只有照壁月之句皆詠黃巖之布水或鶴鳴
峰之馬尾水耳卽如陸羽茶經亦僅言谷簾泉
之美皆未嘗知有此泉蓋以此泉深隱五老峰
之背九疊屏之側從空懸布凡作三級而下望
之不見其端杪又當玉川門盡處其谷九疊其
磴孤懸林密石巉人獸兩絕望之惟見嵐烟窈
冥白晝常晦無所謂瀑布之影象也非如黃巖
之布水鶴鳴峰之馬尾水獨露空中四無虧蔽
從彭蠡湖中可望見其奔飛灑落之狀自非好

事者百計搜奇身至此泉之下鮮不以爲黃巖
鶴鳴峰之外絕無最勝者矣嗟夫天下惟高者
善藏深者晚出泉其有以命我夫亭旣成奉文
公畫像其中而援琴爲三疊泉操以落之
我觀泉兮下不在淵上不在天中不在五老之峰
兮大月之山然則泉安在兮蓋在乎吾心之玄玄
爲天之一兮其生泉也在於雷欲動而未動之先
爲天之命兮所以開乾人知其出於山下兮不知
其以吾心爲源夫以吾心爲源則無往而不在者
斯泉安必其下在淵而上在天中在五老之峰兮
大月之山

花下兒歌

客聞花下兒啼於兒懷中得片紙書兒生年月
日蓋貧婦弗能鞠養置花下冀遊人見而收之
棄兒花間妾身輕兒啼呱呱莫斷聲三朝有乳未
能飲遊人聞泣應傷情妾能生兒不能養花間會
有人來往桐花小鳳花爲胎花使生之葉使長取
兒且作小鳳看黃雀銜珠報不難牛羊昔日解腓
字仁人豈可無肺肝

抱松婦操

宣城某秀才婦未笄從姑避兵匿松下姑將見
殺婦亟出以身請代兵殺其姑而脇婦婦抱松

泣罵兵怒殺之三日猶抱柎不仆
妾身欲化作柎樹抱柎而死代柎蠹三日膠漆柎
爲身峩峩矗立不崩仆龍鱗片片入凝脂作柎疣
贅無窮期乳膏下凝爲琥珀鬢髮上縈爲菟絲有
身不得代姑死哭作柎聲風雨起力拔柎兮一千
尺擊賊輕與蔗竿似柎兮莫作老龍飛妾與姑魂
長在此

紀歲珠辭

歛人某娶婦一月卽行賈婦刺繡自給以其餘
歲置一珠絲絲繫之曰紀歲珠夫歸婦歿已三
載啓篋得珠積至二十餘顆矣

新婚一月卽相別刺繡爲生望同穴歲置一珠貫
絲絲珠知歲月妾不知珠爲懊儂紀年物淚紅點
點成臙脂美日乃是珠母海孕珠大小含驚采鮫
人慷慨泣夜光爭似妾多明月在夫歸數數繫中
珠三十不足廿有餘珠少不足新人用留妾珠兮
在羅襦

菜人哀

歲大饑人自賣身爲肉於市曰菜人有贅某家
者其婦忽持錢三千與夫使速歸已含淚而去
夫跡之已斷手臂懸市中矣

夫婦年饑同餓死不如妾向菜人市得錢三千資

夫歸一嚮可以行一里芙蓉肌理烹生香乳作餽
飽人爭嘗兩肱先斷掛屠店徐割股腴持作湯不
令命絕要鮮肉片片看入饑人腹男肉腥臊不可
餐女膚脂凝少汗粟三日肉盡餘一魂求夫何處
斜陽昏天生婦作菜人好能使夫歸得終老生葬
腸中飽幾人却幸烏鳶啄不早

猿斷腸操

寇入徽州掠諸童稚有寡婦獨子被掠寡婦日
夜痛哭不食死

雌猿失子易腸斷一聲哭向秋天滿哀哀寡婦聲
與同膝下嬌兒抱未煖多日糟糠不下咽猿叫未
終妾已絕魂逐兒行秋復春妾今與兒爲一身兒
有死母勝生母得免湯火當黃巾

隄決謠

黃河滙淮泗入湖隄不能距口決數百里水頭
高數十丈

黃河口決數百里會泗會淮勢不止魚鱉爲人得
幾時復爲魚鱉大湖裏築隄不用費金錢天欲神
州成大川陸沈但得蛟龍喜不惜波濤百丈懸

蹈冰操

翁挈稚孫暮歸蹈河水行中流水裂俱溺死
翁莫蹈冰翁莫蹈冰黃河十月凍未成泥上滑滑

下未生骨狐尾重大不敢超忽翁與阿孫瘴瘵無
履屨中流俱陷苦倉卒貸粟不能且減二口奈此
黃頭兒寧死我衰朽家人哭但望歸雖有翁與孫
不能易升斗鄰雞未鳴村未吠狗婦子被髮沿河
走隄上問無人有人不言空搖手問取黃小狐小
狐跳躑揚其冊云翁扶孫肩孫牽翁肘所入坎窞
大如臼水開須臾合已久哀哀哭至黃昏河伯笑
聲且吞蛟龍不忍食留翁腊待冰龜明年三月來
招魂魄曰噫嘻孫尚存河伯念孫小育孫俾作魚
蝦或風豚

淘鷺謠代漁童作

水流鷺莫淘河我魚少爾魚多竹弓欲射汝奈汝
會逃何

爾逃河莫淘河爾淘河一日使我三日魚不多養
魚在領下不食奈魚何沒水取魚好慎莫竭我小
盤渦

吁嗟淘河魚奈爾何魚師不畏畏爾淘鷺爾浮少
乃沉多吾將廢網罟與爾隨流波取魚爾頤下殺
汝祭蛟鼉淘鷺一名水流鷺亦曰淘河其曰逃河者訛也能沉水取魚或竭小水取魚頤
下有皮袋嘗盛水二次可充數日之食

薏苡謠

食米得薏苡一米二從郎二米儂只一薏

檳榔謠

一檳一榔無萋亦香扶畱似妾賓門如郎

罾布謠

以罾爲布漁家所造著以取魚不憂風颶

漁謠

鱔多烏耳鱗盡黃膏香粳換取下爾香醪

食檳榔謠

檳榔白不食花食花蒂當靈茶檳榔青子初成食
青子當茶清

歡口檳榔花儂口檳榔子花香子不如子甘花不
似甘香得相同何必求連理

亞姑井謠

羅定界石村有東西二井昔有姑嫂同居其嫂
善淫小姑以拒強暴自沉東井嫂慚亦沉於西
井今東井水清人汲飲之稱曰亞姑井而西井
則甚濁也謠曰

水不能清以姑而清姑之清兮水之榮兮水不能
濁以嫂而濁嫂之濁兮水之辱兮惟婦與女水其
因汝人不知之水則知汝吁嗟婦兮畏此水之知
兮吁嗟女兮畏此水之因兮

翁山詩外

卷之十六

番禺 屈大均 撰

詞

一名騷屑

如夢令

纔過鷓鴣啼處又到鬱雞飛處行盡越天邊總是
一江煙雨歸去歸去芳艸幾曾迷汝

又

未盡一灣藤竹又入一灣喬木向夕駐漁篷螢火
照人孤宿相逐相逐已與白鷗情熟

醉花陰

煙雨臺城迷古道春色幾時好誰使馬羣多一片

江山生徧萋萋艸 未過寒食鶯聲老花發應須
蚤處處是邊陰垂柳垂楊不爲南朝掃

念奴嬌

秣陵弔古

蕭條如此更何須苦憶江南佳麗花柳何曾迷六
代只爲春光能醉玉笛風朝金笳霜夕吹得天慳
悴秦淮波淺忍含如許清淚 任爾燕子無情飛
歸舊國又怎忘興替虎踞龍蟠那得久莫又蒼蒼
王氣靈谷梅花蔣山松樹未識何年歲石人猶在
問君多少能記

鵲踏枝

乍似榆錢飛片片溼盡花煙珠淚無人見江水添
將愁更滿茫茫直與長天遠 已過清明風未轉
妾處春寒郎處春應煖枉作金爐朱火斷水沉多
日無香篆

減字木蘭花

春山如笑笑向江波清處照雨淡煙濃一半還含
仙女峰 無窮綠樹不待斜陽天已暮漸遠鄉關
回首東樓雲外看

戚氏

徐太傅園感舊

是青溪一曲流水遶平堤古木過城亂花飄徑使
人迷淒淒問蒿藜東園不見暮煙低當時玉輦曾
駐向此垂釣樂忘歸錦鯉三尺中涓爭買重勞御

手親提愛張星墓左南部妖麗全勝雲西
榆柳
尚有烏棲清露咽咽怕向白門啼鍾山好雪餘佳
氣掩映斜暉逐花泥咫尺舊院芳畦脫寇往日名
齊豔魂不散總作流鶯一半分與棠梨
太傅風
流甚池多畫舫洞有飛梯喜得君王麗曲舉樓臺
一一乞畱題樂工老頓新翻女真雜調亾國多淫
靡教內人朝暮長流涕將往事思寫悲悽奈禁林
朔馬方嘶又彌望毳帳繞青瓶更秦淮畔殘紅片
片只襯香蹄
武廟南幸有樂工頓
仁從駕自稱老頓
滿江紅
采石舟中
苦憶開平驚濤裏石厓飛上恨長江中斷天門相

向形勢依然龍虎在英雄已絕樓船望教祠宮日
夕起悲風裕楸響
臨牛渚停蘭槳月未起潮先
長但通宵慷慨誰聞高唱蠻子軍從南岍成名王
馬向中洲養任幾羣邊雁不能棲蘆花港

金縷曲

舊院

淮水秦時水接青溪煙波九曲影含蒼翠一代紅
顏曲中盡猶記金陵四嫩有阿馬班如堂裏蘭艸
枝枝薰賦客鳳凰毛一半分沙喜無數女矸箋紙
歌樓舞榭今餘幾只桃根當年渡處尙餘香膩
三摺畫橋依然在踏斷長憂朔騎又惹得鴛鴦驚
起明月小姑來復往鼓箜篌楚調應相倚魂縹緲

欲招爾

阿馬謂湘蘭也工畫蘭能詩沙喜亦有文辭

花犯

出胥口作

是夷光茫茫直向三江五湖處大夫相與任白鷺
鴛鴦煙外毛羽洞庭七十峰如許芙蓉能見汝林
屋月白雲相逐飛過天際樹 胥魂不返愧教他
銀濤十萬頃隨潮東注香采後梧宮覆芋蘿無女
應相勸子皮竟遜莫漫把千金仍廢著正好用計
然遺策飄然辭相去

揚州慢

螢苑煙寒鴈池霜老一秋嬾弔隋宮念梅花小嶺
有碧血猶紅自元老金陵不救六朝春色都入回
中剩無情垂柳依依猶弄東風 君臣一擲蚤知
他孤注江東恨燕子新箋牟尼舊合歌曲難終二
十四橋如葉笳聲苦捲去匆匆問雷塘燐火光含
多少英雄

太常引

隋宮故址

垂楊幾樹是隋家欲問後園鴉飛過玉鉤斜拂片
片風前亂花 紅橋流水穿橋廿四流盡舊繁華
把酒坐晴沙且數數春人鈿車

瀟湘神

零陵作

瀟水流湘水流三閭愁接二妃愁瀟碧湘藍雖兩
色鴛鴦總作一天秋

瀟湘二水相合名鴛鴦水

又

瀟水長湘水長三湘最苦是瀟湘無限淚痕斑竹
上幽蘭更作二妃香

又

瀟水淡湘水淡雙雙流出逐臣心瀟水不如湘水
好將愁送去洞庭陰

念奴嬌

潼關感舊

黃流嗚咽與悲風晝夜聲沈潼谷天府徒然稱四
塞更有關門東束未練全軍中涓催戰孤注無邊
腹閔鄉秋蚤乍寒新鬼頻哭誰念司馬當年魂
招不返與賊長相逐麾下興平餘大將難作長城

河曲朔騎頻來秦弓未射已把南朝覆烏鳶饑汝
國殤今已無肉

滿庭芳

蒲城惜別

金粟堆邊冰蒲水畔紫駟迢遞迎來月中驚見光
豔似雲開桑落霑人半醉將長筵弄向秦臺天明
去鞭揮岍曲愁殺渡人催徘徊空嘆惜桃花易
嫁鳳子難媒和香雨氤氳飛作塵埃墜井銀瓶永
絕誰復取仙液盈杯應知爾三春繡閣幽寂委蒼
苔

紫萸香慢

代州九日作

內三關胡門偏險尙餘趙氏長城愛雲中秋色欲

移帳出龍庭正值重陽佳節有樓煩山戍畫鼓爭
迎聽扶南小曲口外兩箏人教莫憶故園乳鶯
邊聲萬里相驚誰聽爾不傷情恨橫磨大劔長驅
突騎雄志無成一天羽毛飛灑卻空羨郅都鷹儘
駝酥更傾千盞一秋沈醉忘卻欲射妖星弓矢散
零

又送雁

恨沙蓬偏隨人轉更憐霧柳難青問征鴻南向幾
時暖返龍庭正有無邊煙雪與鮮飈千里送度長
城向并門少待白首牧羝人正海上手攜李鄉
秋聲宿定還驚愁裏月不分明又哀笳四起衣砧
斷續終夜傷情跨竿小兒爭射恁能到白蘋汀儘
長天遍排人字逆風飛去毛羽隨處飄零書寄未
成

蘇武慢

雪壓天低雲隨山斷咫尺長城無影新魂哭月古
血凝冰沙際至今微冷捲葉嗚嗚未秋吹起霜風
鷗翎頻整望白登臺畔國殤何在在人頭嶺憶
子卿壯歲辭鄉暮年歸國漢氣千年猶勁青羝易
語白雁難通天使烈臣長命手執刀環淚和酥乳
淋漓臨分莫贈嘆多情依戀河梁還餘好詠

八聲甘州

榆林鎮弔諸忠烈

大黃河萬里捲沙來沙高與城平教紅城明月白
城積雪兩不分明恨絕當年搜套大舉事無成長
把秦時塞付與笳聲 最好榆林雄鎮似駱駝橫
臥人馬皆驚更家家飛將生長有威名為黃巾全
膏原野與玉顏三萬血花腥忠魂在願君為厲莫
逐流螢 榆林鎮流寇號為駱駝城馬兒而畏

淒涼犯

再弔榆中忠義

榆谿瀾瀾榆臺下潛流塞外千里風沙亂攪渾河
同濁劍花難洗牛竿飲水帶人血燕脂淡紫念當
年延綏將士三萬委泥滓 憑弔駝山下酹酒黃
狐莫穿蒿里淚痕溼處教無窟白楊花死更恨叢

祠與飛將而今未祀問秦弓可尚在否在媚子

百字令

榆林寺內有唐晉王祠弔之

誰家香火說同光年代鬪雞兒作三箭如何亾一
箭不記彌留遺託聚鞠新場射鴻高磧天子誠多
樂龍餘獨眼有靈雙淚猶落 長恨水自滹沱山
連勾注萬里無戎索手嚼竿酥恩未報十六輕捐
雲朔紫兔霜肥黃鷹風激懶把秋弓拓日斜迴馬
舉杯聊自斟酌

長亭怨

與李天生冬夜宿雁門關作

記燒燭雁門高處積雪封城凍雲迷路添盡香煤
紫貂相擁夜深淡語苦寒如許難和爾淒涼句一片

望鄉愁飲不醉壚頭馳乳 無處問長城舊主但
見武靈遺墓沙飛似箭亂穿向艸中狐兔那能使
口北關南更重作并州門戶且莫弔沙場收拾秦
弓歸去

浪淘沙慢

緱德秋望

塞門近西風乍捲片片沙起吹作龍鱗萬里河吞
倒入地底欲飲馬榆溪無滴水更無定凍解全未
向公子扶蘇墓旁坐天寒苦難已 遙指潰城半
壁凝紫與寸寸長蛇常山勢斷續無首尾嗟地脈
徒傷亭障難恃築愁好止教漢家頻得烏孫佳壻
枯蛻茫茫連天白霜華溼戰聲易歿濁塵外牛羊
來互市恨飛將腐肉成冰魄未冷天鷺掠去弓和

矢

蛻一作骨

消息

應州道中

霸氣沙陀至今尚記晉王興處渾水東環桑乾西
繞總貫長城去不甘龍磧遙連鳳闕一任紫埃爲
主怕胡鷗車輪兩翼欲銜上白楊樹 青艸明妃
黃花主父毅魄未成塵土獵得沙雞烹來半翅醅
酒真憐汝襲秦才疎和戎命薄涕淚空然如雨迴
鞭好紫騮尙識雁門去路

蘭陵王

雲州旅次

大同破猶記姜家作禍藩王邸邊艸上牆紫兔黃

羊嚼花朵葱香雪餅大圍坐雙姬泥我琵琶弄爭
唱玉郎道是西宮內人作 康陵舊經過有五里
鷓鴣旗三里龍舸豹房親上歲蕤鎖愛賈屋妖冶雁
門粧束金元雜劇教婀娜欲迴輦無奈 烽火御
樓墮任馬踏含桃人摘蘋果槐龍陰煖花當臥怕
對對悲策叫雲相和淒酸難聽語客去及蚤箇

意難忘

自宣府將出塞作

山轉雲中問花園上下蕭后遺宮鴛鴦雙灤在木
葉四樓空洋河雪紇干風愁不度居庸恨一春戰
雲慘淡直接遼東 揮鞭且莫匆匆愛笳吹兜勒
邊女唇紅駝鞍眠正煖馬乳飲還濃休出口奮雕
弓更奪取胡驄料數奇徒然猿臂白首難封

滿江紅

山陰道中

咫尺陰山黃水外龍堆相接最愁見邊雲羣起牛
羊無別白艸已將青艸變平城灶與長城沒倩蘆
笳吹出漢宮春梅休折 天斷處沙如雪天連處
沙如月總茫茫冰凍未秋寒徹柳未成條風已斷
鶯將作語春頻歇勸行人莫滯紫游韁教華髮

多麗

春日燕京所見

正春晴畫鼓天街無數玉河橋杏花盡吐八旗人
至如雨更通城紫駝細犢逐盤頭蠕蠕公主錦剪
圓襟珠圍織袖漢嬌蕃豔對傾駟乳御渠畔暖風

飄柳一一作香絮施貂帳三絃四板學唱金縷
又三里豐臺芍藥玉鞭鞭馬爭去插雙雙翠翎年
少丛向啼鶯最多處柘彈穿林花毬鋪地壚頭都
解女真語恨斜日上林煙暝蒼翠欲迷路牛羊氣
吹滿鳳城總作香土

關河令

延綏清明有見

柳毛爭插正冷節向野墳相識枉踏新青靡蕪殊
未碧 黃沙遙接塞北但幾點紅藍顏色鹵地佳
人臙脂嫌太溼

傳言玉女

紅蕖

葉葉抽心卷放總同菡萏吹開無力笑春風淡淡
紅蕾太赤莫是榴裙相染光生雲髻冷侵冰簟
一半含胎乍聞雷吐復斂露華寒滴喜綠天半掩
銅瓶養取變作淺黃猶豔教人那不遍栽窓檻

瀟瀟雨

芭蕉

無端窓外種惹淡秋不斷雨聲來更朝朝暮暮一
心未展復一心開葉葉雖乾不落更助竹風哀蕭
瑟誰能聽月下徘徊 且喜抽花豔甚似芙蓉千
瓣一夕驚雷有灑灑露滴堪取入瑤杯成香牙得
霜方熟與蒲桃顆顆浸春醅綠天裏擦淒涼但自

玉山頽

香牙乃蕉
子之名

憶漢月

瓶中桃花

詞一

白碧紅緋相向春在瓶中嬌養枝枝不必翠林旁
自有雨情煙狀 佳人金屋少空絕世有誰幽賞
一根一葉已傾城迎爾那辭蘭漿

減字木蘭花

新荷

荷錢好大欲買鴛鴦三兩箇未得團圓已有明珠
顆顆懸 銀塘漸煖尚與浮萍離不遠莫損新芽
食得魚肥是落花

念奴嬌

荷葉

穿波初葉似錢時已有明珠無數紅白難知那一
種解爲佳人先吐白鷺東西紫鴛南北爭戲田田
處香羅全展摘裁裙子應許 記得西子湖邊冰

蟾已上猶唱菱歌去欲取絲絲纏玉臂那管芙蓉
無主斜倚冰盤靜搖風佩誰識蓮心苦團圓須蚤
冷飈容易侵汝

暗香

蠟梅

北枝花後又蜜脾點點成葩如豆想是綠珠拋向
柔條被黏取分得黃檀色淺吞還吐微開香口向
葉底朝暮衝寒攀得帶冰溜 心幼被春逗莫只
管半含似他紅蕊露乾雪皺餘氣箱奩尚穿透愁
絕靈娥在遠思寄去百鳥能否蜂釀罷芳未淡且

浮臘酒

郭璞蜜賦靈娥御以艷顏

疎影

鴛鴦梅

層層作蕊更絳趺一一結雙子定是青陵魂入
寒香催教采采重里雌雄不少相思對又恁得同
心如爾更愛他飛雪丹成灼灼杏葩難似堂上
鴛鴦慣見試將七十二來與相比臉際凝脂絕勝
明霞幾片天邊初起枝枝止發臺關驛染遍了白
鵬頭尾記昔年弄玉同攀笑向影邊斜倚臺關有紅梅驛
羅敷嬌瓶中紙梅花
瑤華先吐嬋娟手白繭生不界烏絲細作春光
下剪遲冰綃片片那能似得霜肥香動南枝
兩兩同心照水時

又

錦江滑膩層層染半寫香奩不用花縑多少春光
在玉纖枝枝剪出皆檀暈一朶先簪粉印微霑
翠羽教他盡欲銜

浪淘沙

春草

嫩綠似羅裙寸寸銷魂春心抽盡爲王孫不分東
風吹漸老色映黃昏蝴蝶不畱痕飛過煙村紅
藏幾點落花魂雨過苔邊人不見溼欲生雲

憶王孫

草

風吹一夜卽萋萋未到裙腰路已迷腸斷離人日
向西帶香泥狼藉春光任馬蹄
惜分飛

事到傷心無可訴花落從他滿路此恨非風雨東
皇自是難爲主 片片隨波無一語化作浮萍自
取應識相思處莫將香夢東西去

浣溪紗

不折蓮莖不見絲絲長難繫一相思飛過煙樹少
人知 心似芭蕉抽未已雨聲偏滴半開時郎邊
可有一枝枝

相思
鳥名

又

一片花含一片愁愁隨江水不東流飛飛長傍景
陽樓 六代只餘芳艸在三園空有乳鶯畱白門
容易白人頭

又

不分柳煙花雨暗將春去歌慵笑嬾向花朝恁得
似鶯多語 最恨匆匆神女彩雲無主巫峰十二
已迷人更一片香含霧

荷葉杯

紫燕雙雙飛去何處憑爾寄相思無書只有一紅
絲紅是口邊脂 郎問玉顏消否如舊獨宿繡房
淡牀間畱得鳳凰琴淚溼不成音

念奴嬌

食檳榔

重重萋葉又柳心一片穿成雙蜨灰襍烏爹添莫
少要取津紅如血棗子皮甜玉兒心白細嚼成瓊

眉妃唇甘滑帶脂安得常嚙
中酒更進金柈兼
揆紅袖香愛氤氳絕玉女天漿如水湧渣滓教君
都咽紫穗三花綠房千子會向朱厓掇園園都買
不愁黎女來奪棗子玉兒
橫柳名

沁園春

荔子

夏至初丹喜有蟬催響遍桂洲正丁香大小爭銜
紅翠明珠的皦半擘浮丘膏滑難濡綃輕尙汗一
一先教雙掌畱妃唇嚙笑玉漿四注甘入心流
擎來蚤已蠲愁更挂綠離離堆滿篝愛肉芝成水
無勞艸汁露華可醉不用花筍畱齒何曾含消絕
似解渴須從隼核求酸還好自清明過後餐到淡

秋

掛綠乃荔
枝第一種

荔支香近

入手離離如火成煖玉千顆萬顆燒天砂作芙蓉
熟盤中教注寒泉盡帶鮫綃浴滑膩一點昭儀不
霑肉 諸貴種先數得增城族遍體鮮紅微挂一
條官綠乍解羅襦玉指纖纖忌相觸消受長憂無
福

惜分飛

紅豆

開盒愁將紅豆數滋味應知帶苦泥裏休拋取怕
他生作相思樹 珠淚何年頻化妝顆顆盤中不
住欲付黃鶯去天涯銜向多情處

玉團兒

白杜鵑花

春心傷盡啼無血化爲花枝枝似雪色已瑤姬魂
猶望帝長含霜月紅顏一夕成華髮笑冰姿
脂盡脫暮雨蠶叢朝煙劔閣誰憐淒絕

醉蓬萊

落花

問流鶯何事只管聲聲與花淡語花落休多令流
鶯無主多謝東風吹來紅片染一團朝雨拾得香
魂乳泉三浴黃沉薰汝更用哥窑古甃三兩瘞
取殘英帶絲連絮大石樓邊有麻姑粧處紫鳳青
鸞盡教銜玉造美人香土一卷金荃兩枝瑤管殉
君應許

摘紅英

落花

朝煙泣暮煙溼飛飛爭向鈎簾入收香蛻兼紅淚
煎取黃沉貪驚精氣當堦立春纖拾露多不惜
沾裙褶游絲繫風搖曳裙可畱仙月華多製

一叢花

燭花

初如金粟一絲懸漸似玉芝鮮風吹忽變芙蓉朶
喜心小不作青煙春色泥人殷勤竝蒂膏火莫相
煎難明不必恨秋天自有夜光妍淚珠滴滴成
紅豆欲穿起寄與嬋娟山遠路長因君報喜泣盡
復嫣然

鳳樓春

燈花

細小亦芙蓉千瓣玲瓏透心紅花頭還學綠雲鬆
餘蕊外綴金蟲莫使暗風驚淚落教繡幙重重
鳳樓東春色熊熊一邊雖施一邊猶蓄蘭膏依戀
缸中喜作爆聲朱火吞吐一叢叢金錢休卜人至
臨叩

向湖邊

采蓴

積雨初消湖波新漲葉葉乍浮還沒素手牽來比
銀釵光滑教越娘輕按蘭橈菱花畱取莫與紫莖
同擷隔宿還肥浸寒泉似雪旋下蠻薑半作香
羹啜誰復忍去去和鱸魚輕別鱸具多攜更吳淞
乘月况美蕖千頃非錢買休還恨犀筯玉盤消息
絕且逐鴛鴦向夕陽明滅

八寶粧

孔雀

生長瀧西鬱雞諸族可有孔家金翠宮錦連錢千
萬箇欲作鸞皇猶未春來花與盛衰大小珠毛成
屏還要遲三歲半段恐遭人射看場休至彈指
更用佳人舞衣細拂盡教搖曳開尾總憐惜茜裙
綵袖與朝夕迴旋相媚對嬌影雙雙欲語月明恣
向花中睡笑檻外朱鷗多驚不識情滋味

玉女搖仙佩

白鸚鵡

西洋巨舶蠟鏡蠻奴帶得雙雙純白膩粉粘身金
絲生頂慣自開花娛客不用春纖拍喜番言漢語

諸音都習教兒女珠釵買取好把餘甘綠豆相識
雕籠恐天寒覆被薰香殷勤旦夕東屋漫誇五
色黃裏紅衣爭似冰翎霜翮卻笑越鵲長矜瓊尾
尚有絲絲煙墨未盡瑤妃質恨天與慧性年年添
得祇自記華清舊事宮人教謝至尊憐借無消息
襟前但有淚痕積

浣溪紗

杜鵑

血灑春山盡作花花殘人影未還家聲聲只是爲
天涯有限朱樓當鳳闕無窮青冢在龍沙催歸
不得恨琵琶

阮郎歸

燕

雙雙剪水鏡湖旁萍開一片光游魚正繞紫鴛鴦
輕銜過夕陽新月上素琴張窺人在畫梁巢中
多少落花芳成泥更有香

釵頭鳳

收香鳥

春毛靚黃茸映聞香不覺花開頂爐煙大舒翎待
水沈魂氣那飛簾外在在長垂影雙雙竝心
香吞吐香爲命浮瓊海明珠買桐花生長美人簪
戴愛愛愛

又

當釵立花慵拾倒開紅羽雙煙入沈馥氣成心字
氤氳終日不離香翅戲戲餐瓊粒人相習不

棲枝上愁花溼銅鑪器添蘭桂殷勤么鳳口珠銜
媚記記記

桂枝香

蟬

殷勤八跪但暮送潮頭朝迎潮尾正值沙禾始熟
競銜雙穗黃膏四角隨圓月任雌雄入秋皆美虎
門船返兩籃紫甲一筐紅蛻况濫口河鮑大至
被生釣千頭腥吹墟市多謝魚姑肯賣百錢隨意
更纖手細將香稈爇霜螯對對穿起急歸烹取蘋
花淡處濁醪相媚

又

菱塘北角笑春蛻未肥秋蛻方軟才是禾莖露冷
荻花霜煖膏成橛子筐筐足把玄黃月明同滿虎
頭潮退篝燈照取水邨腥徧喜更有金華火鬢
與海鏡甘分河豚香亂頻學芙蓉沈醉不須人勸
漁家最好真風味就裕江蓴鱠誰換季鷹歸未秋
來能到我家池館

虞美人影

素馨茉莉休分別大小總如冰雪朶朶開當明月
綵縷穿成結因沾膏沐香逾絕圍髻更教重疊
未曙花田親掇要解郎心熱

又

斷腸何必萋萋艸一片落花堪老試問郎邊嬌鳥

啼得春多少 垂楊不把愁心掃
攀折畫樓難到 欲取相思燒了
紅豆憐他小

一落索

杜宇催春從汝莫催人
去人畱卽是好春畱
更一任風和雨 怕見游絲飛絮
爲伊無主落花爭似
淚花紅只滴在分襟處

鏡中人

本意和吳湖州

暮如霜朝似雪長與玉顏相接
形影可憐無別處 處同明月
郎愛箇人那愛妾
妾讓箇人清絕羅袖爲伊開笑
靨更使能言說

鳳凰臺上憶吹簫

至自榆林迎歸荔浦人
看秦地佳人正寶箏調月
斑管吟春忽爾風吹花墜
連嬌女共化珠塵會無
語匆匆入月渺渺行雲
紛紛淚飛似雪揮不到
黃泉霑爾羅巾恨畱仙
難得空縐裙裙欲託哀蟬
落葉爲傳此魂夢氤氳
光離合非耶是耶
髣髴誰親

彩雲歸

羅浮女士本仙靈
折梅花降我沙亭
是綠毛倒掛麻姑
鳥身變化羽服猶馨
文章好玉樓頻召
遽飛歸杳冥
一自月沈雲散
繡閣空局心驚
蜉蝣旦暮在紅顏
更易凋零
別來但苦鸞鶴
清夜叫斷煙

汀剩得伊瑤琴大小嗚咽誰忍成聲還腸斷出腹
嬌兒又委郊垞

雨中花

大別山前人大別芳艸裏新墳如雪宿蜨休飛啼
鶻休去爲守楮間月 萬里樓煩來入越又相逐
煙波一葉魂傷湘纍淚沾秦女定作桃花血

錦纏道

示小姬碎寒

不使彈琴爲惜阿姑仙爪但簫聲倚風輕裊又休
成子朱櫻小短短桃花禁得春多少 更羅裙許
長莫拖煙草露灑灑溼教人笑好日長描取曹娥
帖錦箋千紙點畫都娟妙

高陽臺

紅艸溝寒黃華峪暝頻驚雨雪當秋竝騎三雲雙
雙正擁貂裘嬰雛抱向雕鞍上指故鄉萬里炎洲
念高堂九子分飛饑鳳啾啾 門閣倚盡因新婦
喜秦珠秀麗漢玉溫柔况有銀箏邊聲一一蠲愁
人間樂事天頻妒把恩情忽與東流恨當年月未
團圓花未綉繆

摸魚子

寄秀水周青士繆天白

記當年落花門徑峭帆三度來往分襟忽爾經離
亂且喜故人無恙心不忒涼月夜銜書數把朱鷗
放鄰姬兩兩恨嬉戲相違明馳負去畱爾在菰蔣

鴛湖好咫尺姑胥在望包山爭列屏障新詞多
少漁家子可有雪奴低唱三白蕩多巨口鱸魚潑
刺乘春漲何時見餉與范蠡香蕙越王醉李置我
北堂上

唐多令

閱秀水朱竹垞寄靜憐詞

東短接西長晁家小巷香代州城最細花娘行四
更當年十四鴛水客作鴛鴦送出雁門旁踟躕
廣武鄉上琵琶絃更唱娥郎臂上不知朱十印可尚
在在紅囊

代州有東西二巷是平康里

點絳脣

愁逐春來那知春蚤愁還蚤一天煙艸只有愁來

道花落無多不用東風掃畱階好玉顏誰係一
夕枝枝老

如夢令

含淚相看上馬手執絲鞭難下魂作柳綿飛片片
粘人珠靶休嫁休嫁一任櫻桃花謝

謁金門

愁心亂亂似風花一片帶雨含煙看不見正當春
欲半更有淚飛知霰一夕江南都遍垂柳垂楊
穿一串游絲同不斷

夢江南

悲落葉落葉落當春歲歲葉飛還有葉年年人去

更無人紅帶淚痕新

又

悲落葉葉落絕歸期縱使歸來花滿樹新枝不是
舊時枝且逐水流遲

又

相別久空與夢兒親已恨花房雙燕燕還憎竹簟
一人人有淚溼紅巾

又

清淚好點點似珠勻蛺蝶情多元鳳子鴛鴦恩重
是花神恁得不相親

又

愁脈脈最是暮春初有夢花中爲蛺蝶無情月裏
作蟾蜍不寄數行書

又

紅茉莉穿作一花梳絲縷抽殘蝴蝶繭釵頭立盡
鳳凰雛肯憶故人姝

賣花聲

題鎮海樓

城上五層高飛出波濤三君俎豆委蓬蒿一片斜
陽猶是漢掩映江皋風葉莫悲號白首方搔蠻
屨大長亦賢豪流盡興亡多少恨珠水滔滔

三君謂任

巽趙佗陸賈舊有三君祠在樓左

又

舊曲中

桃葉渡東西白鷺飛低裙腰草長與橋齊一代曲
中人已盡剩有香溪 脂水半成泥流入湖堤荷
花欲踏紫驢嘶燕子銜將魂片片可是淡閨

滿庭芳

奉答張桐君惠陽幕中見懷

堤接鵝城橋橫漁浦渺茫盡是春煙故人愁斷多
爲草連天誰料才華莫用空趨府蠻語年年懷人
句花中葉外多少淚光妍 情牽教鳳子西從藥
市東至香田謾銜得相思一一紅箋此恨何時解
釋垂白矣猶自嬋娟明妃好胭脂未落青塚已淒
然

南歌子

耳墜雙珠重眉拖半月長未笑口生香更簪花一
朶斷人腸

又

額煖裝貂鼠頭高作鳳凰珠翠染花香卻嫌人說
道似吳娘

又

屐齒沉香結釵頭小鳳毛鬢溼桂花膏半粧猶未
就弄檀槽

又

雪粉荼蘼製花梳茉莉裝衣更盡情香消魂猶未
了向平康

又

珠淚成紅豆香心作彩雲
更用好花薰倩誰遙寄
去桂林君

蝶戀花

春流未滿愁蚤滿滿到天邊
暮雨還添滿不識是
愁將水滿不知是水將愁滿
分付東風吹稍緩
莫使春潮只送愁先返
愁返江南人未返不如潮
水從今斷

明月棹孤舟

恁似桃花容易醉芳顏
攔一春憔悴怕見青山
芙蓉曼曼爲似箇人雲髻
點點襟前紅是淚浣教

去舊痕沒計乳燕誰家啼
鶻何代忍說廢興詳細

淒涼犯

得舊部曲某某書

桂林舊部多年散監軍
亦向農圃寶刀血繡花
齒長總歸塵土英雄命
苦恨當日江山不取令
三千奇材虓虎冷落盡
無主回憶沙場上日日
投醪氣雄相鼓舊標在
否幾人還錦衣歌舞報
有戎旗把書帛殷勤寄
與念恩私兩載剪拂俾
作翮羽

滿宮花

最相思樓上鏡長帶
一枝花影嬌鶯定解
夢湘東不向畫簾驚
醒淚染春箋紅雪瑩
錦水桃花相映迴文
書就字斜斜念與東
風教聽

攤破浣溪沙

莫怪匆匆是落花春來誰得久繁華蝴蝶不知寒
食後向誰家 白髮自教成暮雪紅顏不解作朝
霞送盡多情江上客一琵琶

唐多令

魂夢滿江飛茫茫何處歸和煙雨千里離微芳艸
不知人有怨愁望處只萋萋 不用接天低王孫
路已迷恨羅裙色映東西淚共風花相遠近烏柏
下覓香閨

桃源憶故人

輕煙漠漠春何處試問水邊風絮不分晚來疎雨
只共芭蕉語 愁將花信頻頻數畢竟春淡多許
莫遣流鶯催汝一夕過南浦

柳梢青

點點相思落花排就更有長條半繫江南半牽江
北盡作宮腰 啼鶻只爲前朝幾滴血棠梨共飄
惱亂春山白雲愁暮明月愁朝

又

雙下雕鞍秦王故苑共倚欄杆玉豆傳心銀桃引
笑不怕人看 斜陽稍覺微寒回首去宮城上關
無限芙蓉因卿着嫵不愛春山

夢江口

春望斷日夕倚粧樓江上春潮無信久春潮只在
鏡中流流作一天秋

離亭燕

漸到鷓鴣多處愁作一天煙雨芳艸可憐千萬里
長共夕陽無主且莫返鄉關已有斷魂飛去雲
際片帆難駐江上一竿誰許空妒白鷗來復往恁
得分他毛羽掩淚似春山終日濛濛洲渚

酷相思

待潮

沙口寒潮來尚來正天晚吹霜氣又蘭槳前頭黃
葉墜一片也離人淚兩片也離人淚 疊疊芙蓉
如有意每爲我添蒼翠把十樣蛾眉教盡記朝畫

也春山似暮畫也春山似

調笑令

花片花片化作蝶胥誰見黃黃白白爭飛飛逐春
人暮歸歸暮歸暮月向枝頭半吐

又

芳艸芳艸生向江南太蚤連天一片春愁不管王
孫淚流流淚流淚點點桃花又墜

又

邊柳邊柳生在雲西不久清明纔見依依八月枝
條盡飛飛盡飛盡未報閨人霜信

又

邊月邊月何用光爭積雪征人見爾生情爲似閨
中鏡明明鏡明鏡不得長含雙影

漁家傲

五五枝頭還十十前帆已共寒鴉集數點殘陽猶
在笠情悒悒秋蟲未夕紛相泣 朶朶漁燈含霧
溼風吹忽似流螢立幾道星光穿水入舟未及沈
沈戍影愁呼急

又

清明掃二配墓

雨過爭開山躑躅餘紅染得春煙足人共啼鴉何
處哭墳新築鴛鴦兩兩黃泉宿 淚似棠梨飛碎
玉柳條千縷情難續每恨生時多怨曲愁盈日靡
蕪忍作羅裙綠

霜天曉角

遺鏡

流塵久入點點殘脂溼鸞影至今猶在憑香霧掩
餘泣 獨立花半執月中追不及蟾兔料應相伴
桂樹下歛裙褶

女冠子

人日有憶

正月初七正是謝家生日秣陵時酌酒臨桃葉裁
箋寫柳枝 雙飛空似夢再見更無期化作煙和
霧不相知

又

望月

天邊月今夕爲誰圓鏡好不將心事照何如一片

盡含煙光沒海東邊 相思淚霑溼素華寒化作
蟾蜍棲玉殿嫦娥人笑汝孤眠寂寂桂枝前

生查子

淚點白紛紛飛去沾花葉一半作棠梨一半爲蝴蝶
腸斷玉樓人綠艸藏嬌靨歲歲未清明已有
春魂接

春草碧

傷稚女阿雁

雁門生汝因名雁抱上白駝鞍風霜慣行盡紫塞
長城邊女爭看與珠釧憐惜小雛鶯啼花嫩那
畏臘月天寒炎洲路遠越鳥一雙雙南枝返天妒
人月頻圓簫聲忽使秦樓斷織素只三齡同命短

醉落魄

黃鸝弄舌枝頭啼得春光熱離愁不到郎邊說梅
子青青打起穿花葉 棠梨著淚成紅雪爲儂銜
得臙脂血天涯報道情難絕願似沈香生熟都成
結

望遠行

一朵青山一朵愁飛灑淚爭流夕陽更作一天秋
誰忍上高樓 花已落不須春鏡臺交與流塵玉
顏難再是西秦魂夢且教逐行雲命薄古如此枉
用溼羅巾

歸朝歡

姬人欲易琴囊適吳興徐蘋村司業
以嘉興錦見賦拜而受之報以雷葛

莞香並申小詞時司
業將還朝補官祭酒

綠綺雕琴囊已舊漢錦蒲桃何處有美人鴛水一
端來豔過茗上穿花縐剪成勞素手珠徽瑤軫長
消受謝徐陵玉臺好序不及此文繡兒女葛絲
挑出幼爲報襜褕頻織就莞中香角復奩珍鴝斑
一一兼金購共獻飛雪候要知絺綌能長久待歸
朝軟塵拂拭圖取冷風透

石州慢

爲百又三歲潘仁需翁壽

天與奇齡連閨算來剛百三歲神宗一代淡仁聖
子七朝嘉惠栽培一老問歷幾許流離能畱華髮
無蟬蛻日夕一藤簑少衣裳新製無計再逢明
世好把芳尊暗消悲涕休說昇平軒冕光爭門第
芝華采罷自有青絕春山娛人可比芙蓉髻笑我
學神仙尚流連妖麗

桂枝香

題潘氏葑園

山眉不斷與一帶暮煙乍近還遠更有獅洋潮水
入湖迴轉漁帆片片乘新漲愛梅林雪花晴煖柳
邊相送三沙紫蠟四沙黃蜺及春開窓畱半扇
任白鷺交穿窺人書卷驚落雙榕細子飼魚肥嫩
須將舊釀離支酒沃鱸生冰縷霜片蕩舟迎我玉
人攜取醉聽鶯囀

寶鼎現

壽制府大司馬吳公

蚤梅初吐香泛長至氤氳春酒賀亞相含元難老
滋潤東南膏澤厚似瑞雪白羚羊三峽是處炎荒
霑透致出穴嘉魚十里破凍來充籩豆 吐握公
旦今難覲儘人賢依戀裳繡傾四海朝宗節鉞欲
捲牂江歸大斗奮武烈與文謨千載銅柱重標嶺
右看白雉西屠再獻拜舞臺門恐後 幕內多才
新樂府饒歌齊奏願年年張仲留作堂前孝友請
燕喜稍聽絲肉福共康侯受教至道雙曜同流直
與天長地久

湘春夜月

又黃昏夕陽斜映湘陰可惜一片江聲都瀉作愁

心欲抱月光同臥柰月光如雪不暖香衾怕素娥
笑客殷勤玉指起弄鳴琴 楓林瑟瑟螢吹鬼火
葉助猿吟早掩船牕休更作楚王迷惑神女荒淫
雲朝雨暮斷人魂終古情深恨宋玉託微辭諷諫
風華寂寞誰與知音

霓裳中序第一

花殘委碧蘚恨殺紅深和綠淺香冷啼痕猶暖正
蝶影煙沉鶯歌風斷春歸難緩待與誰尊酒持餞
人將老玉顏未駐要把翠娥選 衰損求仙休晚
且導引熊經一轉須知來日苦短有墮馬擎杯舞
鸞弄管帝鄉應未遠早蠲愁荒淫不返從師去女

生相逐玉女一行滿

絳都春

龐妻趙女本酒泉麗質小字娥親陰市好刀磨礮
犀利鹿車中嬉春日日施紅粉捲幃人道佳人挾
長持短誅讎報父不顧嬌身 遂殺凶豪李壽任
蛾眉濺血玉骨成塵孝媛帝憐香名人播已千春
曹娥與爾爭英烈更同緱玉芳芬子胥慙汝吹簫
一片苦辛

歸去來

詠雨中山

生怕春眉人見無物爲絢扇煙雨濛濛教遮面天
風外似花顫 十二峯俄變笑神女楚襄空薦風
流但使詞人羨荒淫好諷中勸

五張機

五張機千絲萬縷是相思春暖春寒郎不念任教
紅淚染成桃瓣點點污水姿

一斛珠

柳條休鞦朝朝攀折誰能那翠眉春共青山鎖多
事嬌鶯苦向枝間坐 落絮紛紛時惹我浮游未
化萍千朵嫌他雪點蒼苔破爲語東風吹向池塘
墮

河傳

杜宇何處聲聲淒楚濺血成痕猩紅染雨開落朶

采氤氳無窮古帝魂 君臣忽隔蠶叢路因情誤
故國茫茫失路恨年年寒食與野死重華總無家

憶少年

青青芳草青青楊柳青青山色愁人獨如雪爲多情
頭白 鏡裏桃花曾太赤更何時玉顏如昔春光
可長駐奈醇醪無力

一斛珠

鷓鴣催我未十里遲遲放舸愁心不逐風吹過落
花誰那偏向離人墮 欲掩雨牕當晝臥又前灘
狂濤聲作滿江漁子爭回柁白鷗驚破飛繞青山
箇

殿前歡

鷓鴣鷄爲誰啼殺夕陽西一聲聲迸思鄉淚霑灑
香泥茫茫客路迷煙樹千重蔽魂夢三春滯花休
豔豔草莫萋萋

高山流水

王惠州生日

一麾出守向南禺似坡仙處處西湖玉局是前身
炎方散吏斯須長庚客白玉仙儒神交汝相見羅
浮四百祕授陰符待蓬萊罷相把臂在虛無 歡
娛褰帷且名郡當盛暑泛酌浮菰玉軫按南薰一
曲早慰來蘇沐清涼長在冰壺時飛嘯聲共驚泉
九十噴薄杉梧恁風流豈羨莊老與天徒

長庚謂
白玉蟾

眞人使君善嘯 羅浮有瀑泉九 芙蓉影

明月逐人來

流光如水芙蓉初洗玲瓏影鏡中誰似露華沾濕
多半寒相倚甚處窺他新藥 吹滿紅陰生怕梧
桐亂爾蕭疎處螢穿未已素飈偏早催拒秋霜始
乍褪殷勤結子

風光好荷葉

似田田似錢錢半作羅裙襯午眠綠香鮮 雙雙
菡萏開花筆當蘭室小楷曹娥代答箋女書仙田田
錢錢辛稼軒妾皆因其姓而名
之並善筆札嘗代稼軒答尺牘

翻香令

香魂煎出怕多煙未焦翻取氣還鮮玻璃片輕輕
隔要氤氳香在有無間 莞中黃熟勝沉穢忍教
持向博山燃且藏取箱奩內待荀郎薰透玉嬋娟

醉鄉春

最好桂林香酒擎出玉杯纖手皎月下豔花間隨
意老人消受 果羸二豪何有天上酒星吾友解
沈湎卽成仙醉鄉日月誰能取

錦帳春

凍雪全融寒風半透正長至圍爐時候念故園春
早數枝當牖梅花開否 歲暮離家淒涼素手與
金錯無緣相就向空囊一哭淚滿衫袖祗添消瘦

賀聖朝

燭花莫剪隨開落况同心梅萼雙心花大一心花
小儘卿斟酌 霜風不使穿簾幙怕芙蓉莖弱知
他多事更將膏火多澆春脚

惜雙雙令

蝶去蠶來如有語愁脉脉無心聽汝血淚多如許
亂飛紅豆如紅雨 驢中定長相思樹誰擊碎珊
瑚無數欲把絲千縷盡穿試遣鶯銜去

憶少年

蕭蕭秋雨蕭蕭落葉淒涼如此愁人欲歸去奈雲
山千里 嘹唳邊鴻空羨爾任雙棲白蘋紅芷長
貧易飄泊把恩情如水

白苧

又淒涼上端水天寒獨宿家園正吐朶朶紅梅紫
菊苦饑驅向人求食愧麋鹿無祿爲沙田闕白露
秋分粘穀秋收又無雲子依稀一斛畱作糜芋魁
兼煮如肥肉 空腹肝腸地錦咳唾天花不堪平
賣持作高堂水菽當此際蕭條有慚僮僕哀蟬咽
咽與悲絃不斷怨簫相續欲返巾車雪霰頻飛催
駕黃犢是處窮途老去還多哭

塞孤

送客出渝關

一聲箎送上盧龍道足裂長城霜草射虎石邊愁

滑倒嘶馬亂開關早猿臂將白頭閒魚皮女紅顏
老向穹閣且共歡好 遙指鴨綠迷路與龍沙杏
古塔何時行到黑海連天那望曉休凍絕埋冰窖
紅鏽水點羊酥羝卧處尋乾燥鴈南時書寄安好
滿庭芳 贈槎滯羅叟
曲水穿林平橋架石數家可是先秦小園誰種花
落錦成茵竹粉乾含鳳尾松膏濕吐龍鱗遮亭畔
三株老桂釀酒最芳辛 生津都蔗外香櫟佛手
丹荔妃脣更甜蕉作衣還用蕉身雪剖黃柑滿乳
霜收綠欖多仁場師好何人得似樂勝橘中人

風中柳

趁取花朝與客探梅光福恨橫塘千株未足北船
隈玉南船隈玉恣春情冷香中浴 峯頭白盡不
見髻螺青綠掃莓苔瓊英萬斛香涇三宿帆涇三
宿約笙歌總歸林屋

聲聲慢

青燐似雨白骨連沙吹魂最苦悲風怨殺將軍城
堅只要相攻分兵乳源無計令胡笳橫截瀧東抽
營遯委金吾花甲堆徧芙蓉 肝腦空膏綠艸恨
野田狐兔會飫元戎幾度秋肥爰爰得脫雕弓鳴
鳴向人悲嘯眼迷離誰辨雌雄終射汝及豪豨持
薦鬼雄

醉紅粧

銅盤獸火熾香煤繞銀箏與金杯兩曹分射一鉤
來愁天曙角聲催 風飄簾外雪花迴紫貂冷苦
相偎煖玉枝枝搔背好雙錦帶爲君開

憶舊遊

寄朱竹垞太史

記河陰祖帳廣武分襟列坐妖嬈未厭笙歌曲又
鞭梢北指京路迢迢鳳池自轉供奉芳訊斷瓊瑤
恨駿骨初收蛾眉已如忽墮雲霄 相要待君處
是四百東樵七十西樵更好離支熟與玉杵堆滿
香柚甘蕉教伊素手分取金液酒中調縱美讓并
州花娘未必無姓晁

江城梅花引

黃花和我滿頭霜怕重陽又重陽不分早梅還與
鬪寒香老去看花如霧裏被花惱一枝枝總斷腸
斷腸斷腸苦參商夜已長天已涼一葉一葉落
不盡悲似瀟湘那得羅浮清夢到蘭房明月笑人
眠太早飛去也影徘徊尚半牀

瀟湘神

斑竹叢斑竹叢淚花成暈綠重重葉葉枝枝因帝
子聲含瑤瑟怨秋風

山漸青

楓葉飛柿葉飛飛逐宮鴉何處歸歸來玉殿非

拔龍旂卓鵬旂獵火山山燒翠微牛羊蔽夕暉

洞仙歌

浮丘石上作

朱明牖戶是羅浮西麓地道潛通到句曲羽人家
石上掩映樓臺花木裏來往浮丘伯叔 稚川曾
住此丹井珊瑚流出泉聲似哀玉社事待重開士
女西園金錢擲大家絲竹笑白髮穆穆上頭來却
不少詩仙暮年清福

南樓令

無奈葉蕭蕭未秋含素飈染霜深怎得紅消碧樹
無端成錦樹片片血作花飄 寫恨滿空寥斷魂
何處招怎相思難報瓊瑤青女多情能醉汝休落

盡為南朝

贊成功

莞城香角血格油沉收藏奩內女兒心買來薰被
費盡麩金雙煙繚繞又到春淡 幾夜風雪飄灑
梅林偏愁凍殺綠衣禽一般雙宿忍使寒暗氤氳
兩翅覆爾蘭衾

驀山溪

濛濛細雨未冷難成雪幾日起乾風但慘淡吹黃
林葉玉顏憔悴無酒與芙蓉朝似日暮如霞紅作
胭脂妾 鏡中人笑華肉無多血辟穀苦畱侯杆
萎落丹華燁燁英雄有恨白首事難成將好色當

求仙放誕過年月

解珮令

芙蓉不好茶蘼不好是桃花根葉都好來自秦淮
似比流鶯嬌小怎消他一枝裊裊 吳綾裁了越
羅裁了怕鴛鴦一對顛倒刺繡多閒儘一十二時
調笑寫蘭葩未嫌太少

虞美人

燈花竝蒂紅蕖似博得佳人喜門簾盡下怕風驚
催把蘭膏添滿到天明 雙敲煖玉圍棋子賭取
枱花綺橫陳直待汝南雞纔上牙牀卻又月沈西

鎮西

邊風邊雨苦重陽寒絕教榆柳未秋無葉枝枝雪
趁胡鷹始擊代馬初肥禽鳴獸咽雲東雲西圍獵
向高闕相將蒙古部南飛倏忽更千羣錦袍馳
突女回鶻笑鞍捎紫兔箭落黃鸝腥臊自割臙脂
半霑鮮血

十六字令

花見爾如何不憶家花雖好爭似臉邊霞

金菊對芙蓉

本意

香沁疎籬菊英誰伴芙蓉千瓣含烟與鶯黃相映
弄粉爭妍朱顏一日能三醉向白衣笑更嫣然九
華佳色玉杯共泛不覺忘天 折取插鬢翩翩向

酒家亂擲勝似金錢與新辭芳豔分付嬋娟長紅
小白同低唱更一朵當錦雙纏拒霜辛苦因公晚
景一倍相憐

花犯

恨炎天梅花少雪凝脂未肥白玉寒珠熱似倒掛
南枝么鳳無力故人欲寄春消息踟躕那忍摘怕
蛺蝶食殘黃蘂團香歸粉翼 仙姿亦復苦愁侵
憐他消瘦甚神傷姑射膏沐少天然好免汚顏色
飛瓊女月中不辨縞衣冷相要同片石喚翠羽啾
嘈歌罷天明愁寂寂

買陂塘

買陂塘半栽芹菜一冬香滿莖葉浮田更種南園
薤青與翠萍相接教弄楫須小摘田田未礙荷錢
疊鳧鷗亂喋怕魯子拋來裙兒湔去搖動一天月
吳淞上聞道蕪絲最滑曾同吳女春掇鱸魚豈
似吾鄉好風味水芹還絕根似雪菹一半甘馨更
與苧蒿發金虀細切作素饌伊蒲清齋樹下日夕
抱禪悅

又

買陂塘半圍楊柳荔支偏要臨水鴛鴦教向珊瑚
影看殺宋香陳紫當小至拋一顆遊魚爭咬揚冰
翅含霞吐綺把黑葉離離朱苞燁燁消受當芳餌

鳴琴去舟逐蘭苕翡翠鮑巴機亦忘矣金盤玉
筋休相憶差與赤櫻相似君且止休釣國桃枝用
盡誰知爾皤皤奈此更酒浸芙蓉丹調菡萏笑逐
采蓮子

又

買陂塘水通珠海香螺紅蟹多有江瑤瑣珞爭膏
滑不向老漁分取秋漲後魚大上黃花白飯量同
斗織鱗巨口向紫蓼開邊丹楓落處斟酌更杯酒
溪橋畔忙問花翁在否如今酣飲非舊吳酸越
辣多滋味方法早教山婦君擊缶歌莫輟河清可
俟須人壽疎星滿留正霜月流空暮天蕭爽嘯詠

莫回首

黃花白飯魚名

南浦

平沙雪積正層冰千里凍河流渾脫浮沉難渡泥
污紫貂裘繫馬苦投山戍望關門半掩武安樓喜
艸間魏兔健兒多射取醉豁邊愁 卷葉更吹罽
栗向悲風驚起鬼啾啾酒長城枯骨尋取月氏
頭細小不堪丹漆任烏鳶銜去作高丘念國殤如
許未歸魂在白狼溝

惜黃花慢

易水弔古

送送魂銷正暮山淡淡寒水蕭蕭就車不顧勸觴
未醮悲歌變羽怒髮衝飈素冠賓客紛流涕白虹

貫斜日光搖怕過橋馬驚豫子魚怪王僚 夫人
七首橫腰正撞鐘御殿貢匣趨朝大王環柱美人
鼓瑟屏風奮越衣斷單綃未應豎子同生劫漸離
好怎不相邀况素要毅魂費爾空招

雙頭蓮

京洛無歸傷萬里神州陸沉都盡英雄無分把壯
志銷向邊頭紅粉訣絕欲向蓬壺便成仙誰忍須
發憤白首飛揚爭雄一天鷹隼 狀貌尚似留侯
但秋來攬鏡微霜霑鬢年將耳順奈一片耿耿丹
心難燼且喜五色肝腸多文章膏潤還拂拭紫鍔
青萍休教血暈

輪臺子

粵秀山麓經故太僕霍公池館作

一片寒烟蔓草忍再弔沉淵太僕閨人共赴漣漪
不少珮環魚腹佳兒佳婦嬉嬉媵湘纍總作蛟龍
族想忠魂未遠尚抱烏號林中哭 荒園咫尺朝
臺望龍馭水濱未復恨江山與金湯四塞難歸青
犢但玉殿虛無翠旗反覆化海思雲愁杜鵑啼相
續莫招魂持衣上屋想隨帝被髮天門哀訴身難
贖

雙聲子

弔東臯別業故址

漢臺南面越城東臂勝地曾作蘅臯湖通珠浦溪
連香谷花木一一分曹蘭亭幾度觴詠罷徒有蓬

蒿難陶寫把絲竹留教山鳥啾嘈 幸狐狸知謝

公白血珍同水碧金膏微軀安惜乾崩坤裂平陵

一灰鴻毛與龍髯馬角和糞土同委乾濠炊殘白

骨牛羊總成一片腥臊謝公謂故督師大學士陳公子壯也

應天長 黃村探梅作

扶胥冬未半正百里花梅暗香相接生長瑤林兒

女一般如雪瓊英堆不掃任門戶玉茵千疊泥土

浣狼藉牛羊藥珠誰拾 多半化蝴蝶與翠羽翩

翩影迷寒月何必羅浮方得夢魂清徹師雄隨意

宿便此處美人尤絕休更待成子青黃始來攀折

眉嫵 新月

喜纖纖鉤掛淡淡痕生初試素娥手未作瑤臺鏡

娟娟影新眉隨意描就短長漫鬪想玉葱殊未消

瘦最堪愛宛轉畫樓前半規映珠斗 仙樣唐宮

那有歎玉蝓獨處金兔無偶不灰雖偷藥淒涼甚

教人翻恨王母素蛾未久更兩宵弓影全殼看三

兩天狼光墜貫他左肘

過秦樓 入潼關作

五谷三嶠函關天阻大河吞渭同流歎虎狼秦滅

但百二關山四塞空留守險少人謀把西京御氣

全收剩虛無宮闕斜陽千里隱映林丘 喜翠陰

廟口琵琶女喚征人繫馬槐麴消愁教兩三鶯燕

各銜將紫萼亂作觥籌看白帝多情有明星玉女
綢繆且興亾莫問飛杖明朝雲外相求

柳梢青

三原春日

南北雙城梨花酒熟一路相迎蔬葉茵陳麪條蝴
蝶多謝歡情嘶花寶馬驪行白渠上交彈翠箏
處處鞦韆人人蹋踘消遣春明

三原酒梨花春最佳

憶漢月

舉山玉井間作

仙女洗頭何處廿八寒潭長去衣翻十丈白芙蓉
笑落一天香語多情應醉我斟滿了玉漿如乳
井中冰藕乞雙枝相逐要生毛羽

九張機

春羅蝶紅蝶白各花窠鮮花食盡難成繭何如蠶
子雌雄食葉三日卽成蛾

羽仙歌

七星巖好有玉屏遮道醉石橫空似人倒倩古松
扶起又花壓欹斜雲半墜知是酒星難老涼風
長繞樹黃葉蕭騷似有哀猿鎮吟嘯恨無人隨步
屨同上崩崖開鳳唳彈取箕山仙操問山鬼離憂
總爲誰與大小丁香向人含笑

霜天曉角

翠樓明月此夕應如雪三兩玉人相倚香露沁濕
雲屨一疊還一疊瑤琴彈不輟恨與素娥同寡

蟾兔外共寒絕

又

此情良苦况復瀟瀟雨長夜苦寒難睡蟲唧唧似
兒女歲去窮不去埋憂那有處白首不堪家累
無計甚向誰語

行香子

都門春遊作

花向東華柳向西華逐春嬉蠕蠕香車欲吹簫策
先鼓琵琶喜人如雲酥如乳酒如霞西曲秦娃
南曲吳娃與流鶯婉轉平沙漸喧邊馬將宿宮鴉
過兔兒溝桃兒店月兒家

侍香金童

雪瘦冰肥淡淡含春色喜香暗清寒人未識蝶子
偷將新藥食剩粉殘酥爲留瑤席怕亂飛片片
隨風難自力更寄語多情休弄笛一朵鬟邊簪亦
得未許全枝玉纖多摘

淡黃柳

端州郡署作署會作行宮

蕭條郡廨曾作芙蓉殿誰記池頭蒙賜宴來去茨
菰葉畔長與君王舊鳧鴈共腸斷龍髯已零亂
剩垂柳欲攀徧御溝西可有殘紅片乳燕窺人但
銜春至巢向空梁莫管

一剪梅

省口看梅

蕩漾漁舟胥口來湖上梅開山上梅開濛濛七十

翁山詩外
二峰隈青失東雷綠失西雷 一夕夷光白髮催
香雪成堆香粉成堆風吹乾瓣作冰埃千片單臺
萬片雙臺 湖中有大雷 小雷二山

翁山詩外

卷之十七

番禺 屈大均 撰

詞二

一名騷屑

風入柸

西湖春日

斷腸人在斷橋邊橋斷幾時連無端橋斷因腸斷
令垂楊千縷還牽愁裏流霞難滿夢中明月難圓
花開花落總啼鶻淚染六陵煙冬青那爲君王
改正清明蒼翠連天多謝斜陽芳艸莫催容鬢年
年

聲聲慢

聞城上吹螺

東西雁翅兩作飛樓江間一片沈浮四角鳴鳴螺

聲颯起高秋淒涼尉佗臺上恨邊聲飛滿炎洲風
吞吐儘秦關漢塞處處含愁絕似金笳催淚與
明妃諸曲哀怨同流未曙頻吹匆匆人馬難畱無
邊戰魂驚起逐行營朝暮啾啾那管得一軍中人
盡白頭

眞珠簾

送杜十五不黨返淮安

南來不憚蠻天路笑風流解作瓊州香估多食女
檳榔蚤已消蠶蠱廢著隨人殊未富問幾時揮金
如土遲暮恨多日佯狂功名難取筋力枉負熊
羆悔英雄未結淮陰無伍且向釣魚臺更一竿煙
雨天餓王孫應有意教識得城東仙姬君去看年
少屠中有誰欺汝

應天長

江南九熟清明近紅有櫻桃裕有粉瑰花調珠葉
襯多謝當壚人不吝下香菰兼細筍食到盤心
爭忍消受自慚過分金錢教莫進

蝶戀花

立春

開歲炎天頻下雪梅蕊遲開凍得南枝徹幾樹天
桃先漏洩春光已被蠻娘奪黃鳥數聲嬌欲絕
一夕東風吹轉綿蠻舌處處壺觴閒可挈嬉遊莫
待芳菲月

長相思

稚子

口櫻桃髻蒲桃兩兩花衫三尺高鷓雛初羽毛
酌醑醢食香飴解乞韋孃歌楚辭春筵纔上時

又

采蓮涇錦帆涇幾曲橫穿花裏城鴛鴦處處迎
蛾眉橋白頭橋風流那得幾春朝臨風且玉簫

菩薩蠻

一春融暖無多日愁花怨草都含泣煙雨解欺人
貂裘典莫頻清明看漸近鶯燕來相問風已幾
多番春殘尚恁寒

月照梨花

天氣初暖簾簾都捲碧艸多情隨人近遠黃蜨白
蜨依依逐花飛春歸只有飛花送煙輕雨重片
片風相弄乳鶯銜去休太頻頻使愁人淚霑巾

醉垂鞭

送別

口北武安樓頻頻見如花面雪絮太輕柔任風吹
御溝愁聽絃上語聲聲怨是雲州莫更向邊頭
臙脂紅易秋

甘艸子

香好香辣香甜滋味從郎取但得一星含自有雙
煙吐結得伽楠心還苦向欲煖猶寒牕戶長把
口鑪焚朝暮任一天陰雨

月上海棠

春風亦要榆錢買滿蒼苔殘雪正微帶玉女祠前
有相思未曾還債風吹去片片撩人可奈 牛郎
不向天公貸恁年年得與聖姑會典卻瑤琴欲求
凰玉簫難代啼痕溼羨殺陶朱貨貝

摸魚兒

柬友

送春帆聖湖歸好苦寒還欲君駐消魂一路多煙
艸况復亂絲風絮誰爲主葭菼際彫胡但向漁人
取流鶯未老且花臥浮丘月吟香瀨嬉爾小兒女
王孫志一劍縱橫未許屠沽休說欺汝江山一
任無人管自有幾雙鷗鷺君莫去還就我扶胥北
岬題詩處低斟桂露待蘭畹編成玉杯書畢始問

庾關略

酒泉子

一片愁心消得幾多明月越羅露下不勝寒尚憑
欄 棲鳥與爾最相干夜夜爲儂啼苦白頭誰作
故人看勸加餐

霜天曉角

鏡中人老鏡外人難好階下紫蘭紅蕙須教變長
生艸 蝶香多在粉拾來和藥擣多取異花薰炙
料得使朱顏係

又

飛飛榆莢片片連花葉欲買舊愁新恨頻移步風

前拾 拾來看上貼勾引雙雙蝶多少碧桃紅杏
不得上臙脂靨

江城子

脂水雙塘未褪紅藕花中有梧宮西子容光半作
水芙蓉半作姑蘇臺上月如天上鏡照秋空

菩薩蠻

粧成未肯離明鏡嫌他鎮日含花影輕罩海人紗
休令生片霞 鬢邊空戴葉免惹雙蝴蝶忘上口
脂來菱花行又開

河瀆神

祠口對浮羅攀枝紅映江波女蠻春賽祝融多數
聲銅鼓相和 潮去潮來蘭槳便龍氣時時驚見
蜺笊魚籃朝散鬪歌風外難斷

露華

白牡丹

素粧淡淡喜絕代瓊姿皎皎難染路入庾關能見
梅花無忝一枝不必姚黃已奪越孃光豔炎天熱
瑤臺夜淡牖戶休掩 盈盈半壓朱檻正浣出天
香珠露微點笑謝雒陽花佔國色長占向暖稍展
攲穉更使玉人勻臉當影坐銜杯共對不厭

漁家傲

水仙

遠自姑蘇來藥市莖莖抽出凌波子六瓣冰開寒
若水純黃蘂香中微帶人間膩 朶大梅花應不

似葉長只爲多泥滓月有精華都與爾清冷裏衣
裳一一生霜氣

點絳唇

素馨花燈

忙殺珠娘未開已上花田渡鬢邊分取燈作玲瓏
去人氣添香香在光多處天休曙熟花方吐朶
朶成煙霧

臨江仙

燈花

香篆氤氳簾影內蘭缸正作重臺雙心合作一心
開芙蓉無種春自火中來光暗不將銀箸剔貪
他再結仙胎殷勤拾取落花煤油污玉指小印定
瓷杯

東風第一枝

桃花

宿雨初晴林煙尚溼舊花又吐新蕊儘他人面爭
紅莫道豔粧未似露華凝滿是西峯明星漿水愛
玉盞盛取芬馨暖處自成沈醉將數朶笑分嬌
子和葉葉半簪雲髻饋餘兒女嬌容更染細綾繡
被黃鶯休掠令片片香沾泥滓向屋角更種多株
灌溉恐煩鄉里

點絳唇

淡紅梅

背有微紅絳桃一半爲根蒂幼姿偏麗種得纔三
歲漏泄年光心吐香難制花雖細弄人多計不
惜臙脂淚

怨三三 鹿葱

三山巷口挈花籃只買安男朶朶凌朝喜半含髻
鬢上可雙簪 休教鹿子來銜這萱艸根莖總甘
好黛色重添和伊爭綠掩映江南

惜秋華 木芙蓉

莫拒秋霜任重臺獨瓣紅衣都染乍得露華新粧
更添嬌豔凌晨已作酡顏醉滴滴天漿未厭堪念
念芙蓉製裳湘纍得占 朶朶暮還歛待明朝醒
解把薄脂重點恨水淺照不徹鏡雲微掩何人見
爾關情折數枝寄來相賺那敢怕鴛鴦露棲葭莢
五綵結同心 荅黃位北見餉如蘇酒浸楊梅

包山始熟玄墓初垂炙得太湖全赤載向閭門去
把三白一一和枝淡漬甜酸得酒皆成蜜隨十幅
蒲帆為客玉顏好盡生紅暈絕勝夏時鮮食 炎
洲荔支誰敵且莫教鬱水織綃人識更有蕭然白
湘湖上香共紫萼莖摘燒春相伴方長命看歲歲
丹砂容色愧滿盤火珠滴滴欲報瓊瑤無力 蕭然山名

在蕭山蕭山
產白楊梅

錦帳春 檳榔

花發房中子生房外一顆顆來從瓊海帶花餐連
葉嚼喜顏紅十倍臙脂能代 大把鹹分小將乾
配儘兒女長盈繡袋汁須吞渣莫吐添香灰至再

餘甘還愛

長相思

落花

一枝低兩枝低黃鳥飛東蛺蝶西雙雙尚自啼
朝煙迷暮煙迷紫燕銜時已作泥紛紛觀馬蹄

昭君怨

春恨天山難到心作漢家青艸萬里逐愁煙雁門
邊不愛闕氏愛汝命薄未同翁主黃鵠莫思歸
淚沾衣

琴調相思引

素馨花

笑擲金錢買幾升半穿嬰珞作珠燈一家織手細
細貫絲繩暮上翠鬟方吐蕊曉辭羅帳尚含冰

夢魂清絕多恐冷香凝

摸魚兒

與友人別

放蘭舟溯江西上渺茫求食何處天涯相見頻相
別同作水邊風絮春欲去恨故苑鶯花總付煙和
雨離情罷訴教夜半啼鶻聲聲向月爲寫此愁苦
思重會當在吳閭古渡吹簫城下應許英雄失
路皆無策慚使浣紗憐汝君莫取鴻鵠在他時自
有凌霄羽功名糞土且滿酌霜醪仍將漁釣共醉
白蘋渚

拂霓裳

從西寧使君乞白鵬

愛瀧西美人爲政鳳來棲閒客好幾羣飛傍訟堂

低雪衣稱白雉金尾笑山雞向清溪乞雙雙分我
媚中閨 憐伊皎潔從不點落花泥香翅上分明
黑白萬絲齊雌雄良友似出入小童攜置蘭畦縱
開籠放去不曾迷

白鷗一名閑客卽越裳所貢之白雉也

踏莎行

鸚鵡稱哥白鷗名客輕輕不把春纖拍更將花片
餵相思銜書欲倩雙飛翼 身是珠孃生從香國
珍禽一一皆相識春情最愛畫眉多郎歸好與甘
蕉食

賣花聲

鷓鴣

兩兩對啼閒聲似人蠻多情喚得玉驄還何處春

淡行不得楚水吳山 南翥向梅關苦竹叢間墮
陽不似北禽寒銜葉未教霜露溼日映花斑

如夢令

孔雀

頂上三毛搖曳箇是峯山冠製徧體錦文圓妒殺
畫堂珠翠無計無計大尾更須三歲

又

尾上金錢如許終日開屏勞汝只爲雨來時欲置
珠毛無處飛去飛去合浦儘多高樹

紅娘子

丁髻娘

戴勝何曾重有髻方爲鳳身是丁娘心如閒客那
堪雕籠喜長來玉鏡小臺邊與釵頭同夢 花朵

開黃茸人作芙蓉弄兩兩穿枝三三食藥何曾驚
恐想纖纖飛燕掌中輕得似他翾動

丁髻娘頂有黃茸毛開若

蓮花

瑞鷓鴣

山雞錦翼許相同雙雙那肯嫁邊鴻欺汝南禽生
長梅花裏日守蠻煙白一叢 梅花最愛梅銷嶺
雌雄各占高峰空愁霜露霑衣望斷羅浮日蚤生
東暖向平蕪喚玉驄

楊柳枝

小小珍禽似畫眉是相思釵頭偷立已多時未曾
知 郎處不須紅豆子殷勤寄雙雙取得繫紅絲

到天涯

醉花陰

翡翠

雄縹雌青相掩映愛殺銀塘鏡日夕浣清波春羽
秋毛箇是佳人命 珍珠一一皆穿竟無爾粧難
靚點綴九鸞釵葉淡花濃要與春光競

齊天樂

比翼鳥

南禺有鳥皆稱鳳鷓鴣乃是蠻子碧樹交棲青衣
兩比長喚歸飛難已時穿煙水與白練紅綃競餐
花藥卻恨鴛鴦恁生多了一雙翅 雌雄誰得辯
汝似迦陵共命鳥鼠同體暮不相思朝非獨寤伉
儷人中無此閨人思苦倩好手邊鸞畫成遙寄鰈

也靈魚更圖三四尾

山海經比翼鳥名蠻

蝶戀花

題唐宮撲蝶圖

鳳子翩翩紛似雪
畫扇低颺驚入
淡淡葉博得君
王開笑靨聞香
忽復穿裙褶
秦女乘鸞顛倒絕
捉得黃鬚膩粉
教輕捻收向鏡奩
成媚蝶承恩好
待華清月

柳含煙

柳

青青眼忍看人人
別人離不管更將
煙雨溼殘春
與羅巾
紅恨綠愁消
欲盡枝上無多
風信一相思
作一垂絲斷腸時

醉落魄

飛花如許無多
紫燕難銜汝
春歸誰作
嬋娟主願
似游絲長絆
郎風絮
韶光誤盡
因煙雨并刀已
剪愁千縷
情多恐化相思
樹人可催歸會
逐啼鶯去

漁家傲

白首夫妻雙打槳
春來最喜西江漲
日日鱖魚爭
入網籠且養香粳
欲換須官舫
鷗鷺那分三與
兩年年共在沙洲上
白小紛紛君不讓
飛蕩漾窺人豈爲梨花釀

一叢花

題西寧長春寺

灣頭錦石似天屏
斜對寺門青
人家盡在芙蓉瓣

恨蒼翠霑溼牕櫺花半未名禽多有姓鎮日共裕
亭天然生就白雲城萬嶂繞空冥春歸此地無
人見儘花氣薰殺仙靈香雨漸消頻生皓月緩步
過前汀

百字令

甲子元日試桃杯杯以匏為之是魏里柯寓匏所貽

野亭春暖喜雨聲初歇鶯歌元日滿酌西王安壽
酒正有千年仙核卻是笙匏天邊獨處星宿同無
匹椒花盛取玉杯慚爾多質蚤共五色鉤連甘
瓜子母碩大成秋實葉佐晨羞餐未厭忘卻盤無
肥炙製就雙卮殷勤我友持作高堂物小兒方朔
自今何用偷得

婦人嬌

生恨東風不解吹愁西去愁多半化為煙雨濛濛
一片令春光無主誰便得消受乳鶯嬌語喚柳
休眠教花莫舞但翠閣水沈千縷含情小坐更輕
調琴句人寂寂芳醞暫教顏駐

畫堂春

天青染得一江青煙波雪後逾明片帆衝破白雲
屏蕩漾鷗汀芳艸茫茫天際羅裙直接空冥看
黃成綠是愁凝春色難勝

賀聖朝

休憎春色濃如酒縱醉人難久愁心攪亂任鶯聲

更絲絲垂柳 歌長歌短總催白髮但瑤琴在手
飛花片片解相依到天涯猶有

虞美人

青山漸漸圍天盡峽口春難認渺茫煙樹帶漁邨
愁見白雲紅葉又黃昏 沙鷗貼水隨波遠吹笛
教飛斷炊煙欲溼雨來時恨爾銜魚高下不曾知

感皇恩

煎香

熟結水沈同剪安火細不取香煙取香氣氤氳一
縷不作巫雲蒼翠味生空裏令人醉 日暖尚薰
夜淡難睡四下風簾恐涼吹鵠斑半燼片片總畱
芳蛻芥茶再浴驚精在

煖春令

一春春暖似春寒值炎洲多雪喜海棠開出枝枝
鐵蚤催得芳菲節 曉風頻遣黃鶯舌向愁人先
說說玉杯滿酌琵琶洲上沈醉娟娟月

漁歌子

開到棠梨不是花鶯啼莫憶舊繁華朝雨急暮風
斜春光催去去誰家

又

夾浦天桃樹樹斜一灣不見一灣花雲帶岼水侵
沙白鷗多處有人家

紗幮恨

蜘蛛會織難成匹枉多絲玉琴半露光如漆網經
時 戒羅袖綠塵休拂任柳綿花片依依更使啼
痕在似煙霏

海棠春

清簫未弄腸先絕正檻外朦朧初月露冷鴈聲沉
水溼螢光滅 柳枝難作同心結但有絮紛紛似
雪莫傷畫裙飛片片成蝴蝶

醉花間

花相識柳相識無限春顏色蕩漾酒船時費盡拋
香力 將情交玉筴弄去聲聲逼天邊月莫圓畱
待人圓夕

酒泉子

不恨啼鶯苦苦只催春去春來只是作愁陰冷難
禁 生憎泥陷馬蹄淡盡是紫霞紅雪得歸香壘
也甘心燕須尋

又

最恨薜蘿消受羅裙雙帶影暖風吹去復吹來在
蒼苔 踏青爭上越王臺蝴蝶不因朝雨散鷓鴣
休爲夕陽催且徘徊

浣溪沙

欲使緋桃嫁碧桃瓶中交插兩枝高朝朝對取酌
香醪 白髮不須求大藥紅顏自可解離騷并州

那有剪愁刀

又 桃溪

榕葉陰陰又木棉芭蕉黃映一溪煙人家半在峽
門邊 蝦菜未殘三月市魚花爭上九春船愁同
百丈盡情牽

點絳脣

分付東風卷愁西向秦天去甕頭香乳舊解貂衣
處 那日花開持取歌金縷鞍難駐淚和紅雨半
溼關門樹

又

看殺春山翠睂何必長如許黛邊煙雨莫使人描

取 掩映高樓花缺偏窺汝斑枝樹令栽無數遮
盡芙蓉路

小桃紅

不怨春光去不望春光住只願愁人一年一度與
花相遇縱青霜白雪總盈頭也爲鶯燕主 花作
誰家絮鶯作誰家語化蝶韓妻乘鸞秦女總歸塵
土且安排紅酒紫金杯聽玉兒低訴

漁家傲

觀邊女調神

割肉如山生啖取黃羊不及青羊飫腹飽還須多
飲乳廬帳裏羶風吹起沙如雨 兩兩調神蒙古
女花冠對插山雞羽大漢將軍香火主歌且舞威

靈莫把蕃兒怒

荷葉杯

獨酌

圖取玉顏醜甚多飲吹醒畏東風桃花要與爾相
同紅麼紅紅麼紅

又

春日春人惟有春酒朶朶照瓊杯山茶花被海棠
催開麼開開麼開

傷情怨

枝間紅淚漸少喜杜鵑開了收拾春心休從花內
老 憐他梅子尚小打乳鶯一一難到入口先酸
青黃愁未蚤

賀聖朝

巫山一望堪愁絕况蒼蒼煙月三聲猿嘯一聲流
淚兩聲流血 瞿塘纜上那知白髮已毵毵如雪
多因神女氤氳香雨無端相接

酒泉子

三原元夕

鄭國渠邊寶馬亂嘶秦月滿城燈掛白楊枝上元
時 彈箏打碟響參差曲曲口西關外邊聲多半
是相思少人知

又

猶記踏青煙煖三原春正豔喜涇陽人盡至又頻
陽 二城南北花相向總是姑蘇樣眼紗不戴香

韉上任端相

番女八拍

彎弓爭落海東青插雙翎香貂帽子魚皮女兩兩
馳過粟末城 竿酥多食復駝羹玉肌腥春寒擬
坐溫湯去笑擁闕氏向盛京

南鄉子

琵琶尾鳳凰頭相逢識是柳城舟雙雙桂檝搖纖
玉沙鷗逐思得湔裙香水浴首二句言舟形也

臨江仙

前鏡那知儂影好憐人更有菱花胭脂忘作臉邊
霞春來無力日日髻鬟斜 不使香貂為抹額天

寒尚束輕紗海棠簪罷又山茶恨伊雙燕銜去向

西家

醉春風

友人餉金陵雪酒

春色如斜黛篋成香可愛梅花三白總將來賽賽
賽花裏封泥柳邊開甕客愁全解 嘆爾情如海
紅友頻相賚可能移得惠山泉再再再頻使溪翁
玉杯長滿玉顏長在

減字木蘭花

梨花未絕朶朶沾泥猶是雪欲嫁東風自有蠶媒
送落紅 連朝煙雨一見春光都欲語酌酒庭前
忍舍鶯聲去晝眠

天仙子

雙鬢但將蝴蝶賽露花油好嫌香大吳閭學得牡
丹頭釵不戴珠不愛只有一枝蘭作態

又

自織纖纖嬌女葛霏霏蟬翼同輕滑裁爲夫婿夏
時衣風莫縐汗莫透管取清涼長似舊

搗練子

春欲去去天涯片片殘紅似落霞蝴蝶飛過蝴蝶
艸鷓鴣啼上鷓鴣花

謁金門

望廬山

煙水外染得一天螺黛欲雨山腰先作帶瀑泉添
幾派春色氤氳長在一片霎成雲海點點芙蓉
看漸大欲從天際采

巫山一段雲

片片瑤姬影飛來最有情朝朝暮暮不分明愁與
夢魂疑雲溼疑行雨峰開似列屏髻鬟染得一
天青一朵一仙靈

蘇幕遮

題盤齋

虎頭雲獅口水風捲虛無飛入疎簾裏古木陰陰
涼不已無數蟬嘶又逐柝聲起荔成花萼有子
多種丫蘭分我莖莖紫肝瞻還教甜到尾抱甕相
從我亦忘機矣

如夢令

一夕恩情似夢臂上猶書嬌鳳忻口再來時天曙
更無人送鶯呀鶯呀費盡春聲何用

又

荅龔柴丈見懷

五畝清涼山下人買煙霞無價解帶竹風吹書卷
半拋花架多暇多暇爲我更圖嵩峯

江城子

春魂如雨復如煙暗吹斷落天邊無情花片相逐
又明年人笑海棠消瘦盡明鏡好尚相憐軟同
人柳只多眠怕啼鶻到簾前愁壓春山不使黛雲
妍枕簟爲誰寒欲絕教寶鴨斷沈酸

掃花遊

題蒲衣子深廬

柳塘蕩漾正片片寒鷗亂紅爭浴問誰水曲把秦
人洞穴影藏淡竹白犬黃雞亦愛漁郎信宿雨新
足喜灌溉稍閒能把書讀山翠低染屋恁耐得
青青十着春綠傍簷種菊漸參差逗出數峰麋鹿
玉甕霞浮儘爾神仙厚祿過幽谷聽鶯聲又兼絲
肉

念奴嬌

追和龔蘅圃喜子
移家白門之作

昔年浮宅向金陵會住莫愁湖口最是鍾山黃紫
色未遣蓬牕辜負上岍牽舟傍橋作屋兒女同魚
畱殷勤公子笑饋鶯邊春酒更將畫舸相迎秦

淮人至新曲歌紅藕正值燈船簫鼓起廿四航間
如晝徹夜邀歡天明忽隔庾嶺梅花口相思長在
汝南無數煙柳白門有汝南灣

清平樂

海棠絲短不遣風吹斷一朶依然紅玉軟畱與粧
樓寄遠楊花未作浮萍枝間交映青青拾絮殷
勤作枕郎歸定愛芬馨

洞仙歌

贈潘季子花燭

開年幾日喜蠻花香雜未盡春寒尚重祫正佳期
十五明月團圓初一度蟾兔陰陽相合玉郎題
賦罷盼睐雙星冉冉仙人下雲閣自有板橋長靈

鵲殷勤休環繞絳河三匝問七夕何如上元時有

處處張燈火花煙蠟

潘娶板橋

天淨沙

塞上

沙如亂雪飛來風吹忽作龍堆塞水橫衝不開馬
蹄溪陷一鞭飛上平臺

又

桑乾濁似黃河冰開難飲明駝滑滑春泥苦多鹵
兒呼渡雌雄兩兩吹螺

海螺有雌雄其聲各別

又

關門一綫浮圖黃雲半塞飛狐雪盡鶯花未蘇駱
駝鞍煖春宵臥過盧奴

又

千山已作邊牆長城更與天長一望教人斷腸紫
荆關外茫茫只有牛羊

又

天寒雉兔偏多揮鞭躍度洋河一箭雙穿鴛鴦角
鷹饑汝鞍邊割肉峨峨

又

天明已飯黃竿笳聲催上辭鄉淚落還因夕陽蔚
州煤好春寒可代衣裳

辭鄉
嶺名

又

盤山下見盧龍三盤始上三峰欲去依依暮鐘可

憐明月秋來只照邊烽

又

居庸一口容人開門誰揖黃巾虎豹何曾苦辛黑
裕林裏無勞間道通秦

春從天上來

壽制府大司馬吳公

幾載炎方總兩粵諸侯師保堂堂袞衣開府彤矢
安疆五星井宿光芒笑漢時大長踰百歲魁結稱
王我君公但南交虎拜東海鷹揚長隨麗空雙
曜作守日黃人出入扶桑沐浴精華卿雲葩爛更
多倬彼文章寫五臣謨訓和騷雅傳與旂常養羣
賢看天衢輿衛雷雨同行

訴衷情 小妓

開唇只唱月兒高未熟小櫻桃雛鶯身似琵琶短
短繡花袍能勸客白酥醪綠葡萄蛾眉教畫鳥
爪教搔莫弄檀槽

玉蝴蝶

雲客高子得水巖石一片大如掌許鋸分之狀
如蝶翅左右有斑點十三四背有六七如鴿鴝
眼碧綠相暈高子愛之將以為異時飈輪而御
太虛屬同人調玉蝴蝶詞

蝴蝶粉鷓鴣斑凍凝雙玉間知是漆園閒翩翩夢
未還化煙碧連花白風影欲雙鸞看爾當鸚鵡

竝飛誰可攀 比翼鳥一名鸞鸞

阮郎歸

春來莫使杜鵑知杜鵑花已飛海棠更是淚紅時
片片付游絲琴不弄酒空持愁心盡在看裙邊
蛟蝶怕風吹房簾深自垂

散天花 浪花

吹作芙蓉上下飛天邊纖手散是江妃風為根蒂
水為枝天然冰朶幻出漣漪舞入雲中不用衣
沙鷗驚復下欲銜時依依不忍別斜暉為伊春不
用自芳菲

青玉案 題王蒲衣無題百詠

鄜瑯大道風流在苦春思如煙海筆似辛夷初發
蕾玉臺神麗香奩幽豔珍爾芳年待大珠孕就
三千琲一一脣邊少人采不嫁朱顏光更倍繞庭
鸞鶴滿身蘭芷生妒勞眞宰

一斛珠

題林文木琴畫看竹圖

蕭疎翠竹美人手爪時相觸枝枝葉葉如新沐寫
向鶯綾看盡瀟湘綠冰綃細摺成春服針神更
使人如玉絲絲難繡文章腹腹裏流光照映篋管
谷

訴衷情近

西寧山中

野煙霽處掩映茆茨乍見家家水碓春香一一山

籃采笄愁是畫眉催起淡淡蠻粧總把山花襯
山鷓近最喜搖歌靜引數聲林外啼得春情盡穿
枯粉髻娘扇起雙飛欲射珠毛誰忍但抱無端恨

雨中花慢

越王臺懷古

雁翅三城龍荒十郡秋來不減邊沙恨牛羊有地
雞犬無家雖少諸軍浴鐵還餘幾隊吹笳朝臺試
望天似穹廬直接京華趙佗箕踞南武稱雄遺
墟問取棲鴉誰得似斑駘漢使才藻紛葩湯沐千
年錦石文章五嶺梅花綵絲女子爭看旌節色映
朝霞

行香子

漁歌

第一魚鯧第二魚魴第三魚是馬膏鯪潮鹹潮淡
一任漁郎喜春風來黃花短白花長 江水魚香
魚子滋陽大督船滿載鹽霜鼠公鼠姥兩兩開洋
夏鱗魚寒鱸魚熱鱠皆良 黃花白
花魚名
慶春宮 過樓桑村和宋長白
葉作重樓枝爲華葆一桑實兆飛龍宗社重興高
光再食三分已有成功能存正統益州小豐沛可
同君臣齊力千里偏安與賊爭雄 天教季漢匆
匆難起隆中易復關中二表三書春秋相翼血誠
總貫長虹我來瞻拜思燕涿還生我公南陽耕罷
那得風雲慘淡西東

傳言玉女

巫峽

棹下瞿唐忽見滿天蒼翠玉姬織手壘煙螺十二
魂夢未冷作雨今還香膩君臣非惑仙靈多媚
二暮三朝已黃牛又白帝却看娟妙若明霞水際
胭脂水傾半染楚妃衣袂香溪微飲使人如醉

鳳簫吟

綠珠

白州山煙明雨媚梁家秀出飛瓊宅邊香井水綠
珠多飲作弄笛仙靈遠歸雙笛好是茵于傳得奇
聲向細犢車中響飛散滿瑤京 粧成懶縫絲布
懊儂新曲吹徹青冥曲多餘十五石家教弟子宋
鞞知名漢妃時妙舞笑翾風難鬪身輕喜不負鮮

葩一墜千載芬馨

遠歸綠珠笛名茵于神女名從空中教綠珠吹笛者

萬年歡

為百有五歲梁淳儒翁壽

綠髓青瞳豪眉華髮八公推爾年尊膝下公沙龍
子一一多孫一百春秋又五奇齡好天與東園東
方妾大小鴛鴦蚌胎新產珠媛凝脂滑膚作枕
與辟寒燕玉日夜春溫玉女明星漿水兩乳香噴
不使張蒼齒落多飲取孩笑同喧茶杖杖扶過花
村壽星人喜臨門

燕歸梁

幾片春光燕嘴邊紅溼露啼鮮海棠絲短也相牽
殘夢後斷魂前粉餘飛雪香消沈水無計更畱

仙東風好送向花田蘭麝土早成煙

江南春

花已攪柳還牽荷絲縈一縷荷葉疊千錢苦心成
藕悲蓮子蓮子成時郎不憐

山花子

杜鵑

血灑春山盡作花花殘人影未還家聲聲只是為
天涯有限朱樓當鳳闕無窮青塚在龍沙催歸
不得恨琵琶

桂枝香

賀梁太史給假南還

才人得志喜錦繡畫還秋氣晴爽鳳閣鸞臺第一
紫微初掌炎方休沐承恩返駐吳帆玉人同上鏡

中花吐簾間月墮助君娛賞 笑未老珠生滿蚌
更方朔金門細君三兩富貴神仙總得有何遐想
文章百卷雖塵垢喜高名日月皆仰鑄堯陶舜祗
須糠粃藐姑誰讓

春從天上來

爲前制府大司馬吳公壽

梅萼爭紅向亞相生朝開徧春叢凍含香雪晴弄
和風綠毛鳳子相從正袞衣清暇罷節鉞洗沐佗
宮恐京歸願朝廷更假三載居東 公如古公天
壽得白兔雙丸綠髓青瞳好德康寧年過著艾未
來耆造無窮作萬民師保將雅頌盡變蠻中更歌
風俾聖人膏馥霑丐童蒙

柳梢青

綠艸萋萋一春愁望祗在花溪北地香魂南朝碧
血總付鶻啼 征人一騎遼西共誰宿黃駝白羝
朝逐風笳暮歸冰窖可念深閨

一斛珠

嬌兒開袖芙蓉花出櫻桃口多生定念蓮經否欲
吐芳香輒自含辭久 荷葉不離雙玉手朝朝暮
暮來擎酒半酣方肯歌紅豆不信嬌鶯似爾春聲

溜

歐陽文忠公有姬姓盧名嬌兒姿貌端秀口中
作芙蓉花香有蜀僧曰此人前身爲尼誦法華

經二
十年

又

海棠絲短輸他楊柳絲難斷流鶯繫得枝枝滿莫
只貪眠不耐腰身軟 花絮無情風自亂看痕一
任春深淺生憎一樹含煙煖每共芭蕉片片心舒
卷

又 乞某子作書

古肥今瘦三真六艸多仙授銀鈎蠶尾人爭購一
幅鵝溪爲寫蘭亭就 筆虎而今誰怒手天門龍
跳爭馳驟墨濤翻處蛟螭鬪更乞驚鸞字字教如
斗

鳳樓吟

贈李孝先新婚

壻和翁冰清玉潤翩翩兩藻還同最嬌梅福女月
華才貌正喜早乘龍恰當春禊候浴桃花持贈蘭
紅作好會鷓鴣碧簫響徹煙空 香風畫樓吹處
錦箋斑管分賦匆匆一雙如絳樹一聲歌兩曲莫
辨雌雄鳳皇飛復止小比肩長日房櫳與沈氏青
箱愛子金粟連叢

山亭宴

禊餘上巳過三日正清明棟花堪摘知是幾番風
乍寒暖春醪少力杜鵑啼得杜鵑開淚紅處榴裙
無色辛苦汝流鶯拾不盡儂香魄 裊空半逐遊
絲入又吹散蝶黃蝶白儘意莽芳菲做慘淡煙乾
雨濕新時爭似故時憐此一度倍生悽惻情去枉

畱仙綵履那堪執

垂楊

暮春客鳳城假寓黃氏池亭有作

芳春欲杪漸荔枝吐藥木棉殘了細雨含煙未成
流水滂沱小甘溪遣送清泉皎主人雅玉缸分到
潑茶香寒坐枯間對鳳山娟妙聞說鱗魚夏早
已三五蛋郎竹竿輕嫋喜住灘頭不愁紅頰櫻桃
少花醪況是荼靡造任酣暢鶯聲四繞流連忘却
歸舟情太好

十二時

送蒲衣子入山

送君歸亂山歸去婚嫁參差都了想竟似無情春
杳不使鶯花纏繞玩弄清琴沉酣玉醴怕不成仙

道且養壽影滅嬋娟却笑蔡家猶愛纖纖姑爪
顏未衰心花意蕊况有十分光姣鏡裏復紅分明
大藥不在丹干好引嘯時有風飛身欲在煙杪
恨此生茅龍未徧五嶽猶牽懷抱莫學盧耽翩翩
毛羽拂盡洲和島恐去家未久歸來但見華表

洞仙歌

長壽禪室瓶花

丹葩素蘂與心華爭放天女持來笑相向膽甌中
朶朶春色撩人深護取莫遣風吹半颺嶠南無
月令元夕芳菲已逐流鶯亂枝上幾種插徧多萱
共天桃薔薇畔海棠三兩但注水空生不須根任
好在房櫳露華滋養

更漏子

無數落花人不惜拾紅浴向清溪
臙脂不使作香泥鶯掠去東西
休絮亂與絲齊牽人只似柔荑
無情枉作有情啼杜鵑聲且低

羅敷媚

碧桃

洗紅盡褪天天色雪粉猶多不肯顏
酡濃淡臙脂總笑他看朱成碧
朦朧甚祗爲相思不見紅兒
化作瑤華怎得知

醉春風

緋桃

濕透非紅淚春風吹得醉東君
還與賜宮緋試試試香送餘寒色
添初暖儘情妖媚乍似飛瓊至

丹玉盤邊侍未應穠豔更施朱
記記記惟有東鄰學他千笑惹
將春思

蝶戀花

春情

似雨如晴春乍暖漠漠輕煙未肯含
愁淺悵望不知人已遠踏紅似向
花間轉亂落杜鵑餘幾片付與遊
絲莫被風吹斷紫燕銜香知有怨
怨他情與東君短

天仙子

翡翠蘭開如翡翠朶朶教人長日醉
玉壺無酒又春愁因柳色怕登樓
一任年光逐水流

帝鄉子

花
花
一
枝
紅
一
家
大
小
髻
鬟
都
有
似
朝
霞
蝴
蝶
逐
人
來
去
粉
沾
青
額
紗
團
扇
撲
將
三
兩
莫
傷
他

古調笑

蝴
蝶
蝴
蝶
片
片
如
花
似
葉
休
教
亂
舞
春
風
攪
起
苔
間
墜
紅
紅
墜
紅
墜
半
化
臙
脂
香
淚

又

楊
柳
楊
柳
日
日
長
條
在
手
流
鶯
何
苦
多
情
啼
到
枝
邊
月
明
明
月
明
月
冷
浸
滿
頭
冰
雪

訴衷情

爲
愛
腰
肢
多
種
柳
拂
朱
橋
垂
繡
戶
雙
舞
當
妖
嬈
看
殺
落
花
朝
搖
搖
流
鶯
花
外
招
向
長
條

河傳

芳
草
萋
萋
官
道
恨
爾
如
煙
一
春
相
逐
夕
陽
邊
揚
鞭
趁
晴
天
天
愁
却
比
人
愁
重
雨
如
夢
暗
把
韶
光
送
東
風
休
作
落
花
媒
吹
來
含
啼
向
酒
杯

風中柳

家
本
農
桑
未
愧
晉
朝
先
隱
向
沙
亭
沉
淪
自
分
北
田
鹹
褪
南
田
膏
潤
謝
天
公
解
憐
肥
遯
翻
犁
及
早
生
怕
特
牛
春
困
漫
偷
閒
今
年
雨
順
舊
杭
香
粉
新
杭
紅
醞
待
秋
來
惠
沾
鄰
近

河瀆神

榕
樹
與
油
葵
掩
映
天
妃
廟
西
一
江
新
水
帶
春
泥
數

行瀉瀉飛低 婦女楓香燒早暮魂斷茫茫江路
生怕去年風颺破蓬休起漁浦

醉花陰

以竹節大斗為元兄壽

一節瑯玕開大斗斟汝滿春酒金老飽風霜磨用
陰山玉爪清光透 龍公早向羅浮取光怪象靈
壽葉大似芭蕉卷作荷筒更可娛黃耇

虞美人

無風亦向朱欄舞情為君王苦烏江不渡為紅顏
忍使香魂無主獨東還 春含古血看猶暖巧作
紅深淺花前休唱楚人歌恐惹英雄又喚柰虞何

燕歸梁

不是棠梨卽杜鵑一路含煙更多蝴蝶化嬋娟春
如夢但茫然 清明幾度披芳草餘蘭麝在重泉
三聲寄與峽中猿向冷月任哀酸

錦堂春慢

賀廖君新宅

地是蘭湖城當穗洞華堂新見翬飛羨王家春燕
復返烏衣碣石宮邊久客浮丘市上初歸鎮向花
林偃臥長弄瑤簪長弄珠徽 錦里先生接近又
青蓮白苧詞筆同嬉笑桐孫百尺桂子雙圍蕉老
雌雄仙蝠梅芬大小豪犀未化千年霜羽尚識盧
耽尚識令威

東風第一枝

送張君携家返杭州

荔蕊初含棉花欲吐春光漸與膏沐乳鶯催憶香
涇旅雁引辭檻曲蘭橈蕩漾羨歸客鴛鴦相逐漫
計程想到明湖尚未藕肥菱熟 知佩有大紅嬌
蝠么鳳子再看羽綠早從奔月靈娥乞得兔兒在
腹羅浮曾至怎忘得芝甘如肉待宦成散帶重遊
肯作洞天梅福

木蘭花慢

竹葉符

向籠葱摘取問蟲篆是誰書似蠹繡丹經魚餐綠
字巧出仙餘麻姑戲將鳳爪印龍紋一暈一河圖
更綴陰陽小押辟邪畱在冲虛 研朱籀隕亦霑
濡掩映雪消初笑帶風與露膩香春粉總贈芳姝

林於洞庭萬樹柰斑斑只有淚如珠那得雙鈎片

片驚鸞跡徧蕭疎

冲虛觀名
在羅浮

水龍吟

五色雀

洞天偏是朱明鳳皇生長紛孫子更多五色絳翎
作長綠兄紅姊大石樓邊錦屏峰際羣飛相比與
碧鷄丹翠雌雄三兩教王母長驅使 又有鷓鴣
越翅糞奇香水沉真似鷓鴣對對擣餘靈藥連聲
呼爾解識仙儒洞門遙迓導歸花市愛迴翔逐我
絲衣兒女作高堂喜

買陂塘

仲春六瑩堂讌集

為聽歌滿堂魂悄吳音爭奈清婉風流串戲多騷

客酒待曲終方勸人氣暖吹幾陣紅香影向瓊
亂鶯長燕短任珠斗光低玉壺聲盡猶未放金
柳供驅使生怕綺筵雲散君不見金粟老神仙富
貴從舒卷沉冥未晚正細雨輕煙似他人柳眠起
不勝軟

定風波

送李廣文之新興任

羨新州咫尺羊城蘭舟五日即到笏竹陰中蒲葵
影外野鹿時相召講堂開允溪繞祭酒多閒但長
嘯憑眺有碧山廿四春看娟妙荔支未少似丁
香一樣雌雄小與盤中紅蓓芬馨共啖誰似儒官

好玉杯篇洞璣艸休歎箋經苦不早爲道一瓊雖

冷諸生師保

新興產荔子小而香名曰香荔他地所無

西湖月

六月十六夕惠州王太守邀泛西湖

炎天向夕偏涼愛皓月仍圓流光如笑畫船輕漾
蠻童緩按十番兒小使君頻有賦儘曲水風流吟
共嘯更布簟犀帶橋邊弄徧紫荷紅蓼生憎一
帶山看染玉女青螺影連浮嶠洞天爲主三千天
鳳柰他仙爪神仙多散吏恨白玉真人招未早怎
當得西子錢唐更勞蘭櫂

公與白

玉蟾仙師若有公未蒞惠先夢

到惠及杭州

又前題

纖雲蹙損金波卷一片秋光全歸明鏡數聲歸笛
棲禽欲起亂翻林影弄珠人有約待七夕浮燈穿
菜苻便萬朶分與漁舟看取逐流誰定知他幾
處西湖有此地才華主賓相稱右軍顏好凝脂點
漆白頭交映文心吾亦似覺老去雕龍今不競願
良會歲歲歡娛飽聞高詠

買陂塘

奉陪王太守俞別駕佟大令雨中泛西湖作起句同用張翥

漲西湖半篙新雨畫船初試煙水知君雖作湖山
主心與海鷗相似秋欲至荷葉外微茫漸識蘆花
起溪頭洞尾向山影沉浮泉花噴薄頻得白魚喜
長橋畔燈火漁村尚未疎鐘微出蒼翠蘭橈蕩
漾無人見教駐數聲歌吹觴並止堤上步沿洄稍
近黃塘寺林楓乍墜正宿鳥巢邊涼風蕭颯心動
欲歸矣

無悶

娛江亭雨中作

城東雙江亭俯萬峰煙雨迷離望眼恨久客無端
故園非遠望得秋涼颯爽又攪夢風將疎林卷竹
聲更苦煙啼露咽忍教魂斷休歎有人管是幾
朶芙蓉鎮同蕭散任冷落炊煙玉琴遲典要向豐
湖好景待月上梅花彈僧院更一笛吹破閒愁頻
放舵樓西返

洞仙歌

為惠陽別駕俞君題揮翰圖圖有美人十三

牙山寺卜詞二

三

蓬萊一股與鵝城仙吏玉女紛從女生戲展花綾
兩兩催寫香奩添一箇便是鴛鴦十四 洞天圖
畫裏不向丹青爭識麻姑更妖黚爲著淡鵝黃么
鳳憎他毛全綠掩君羅袂任夜夜箏調十三絃怎
得似清琴靜含秋水

戚氏

端州感舊

片帆開又上西水向榕臺想像當年羽幢東駐作
蓬萊宮槐接天街紛紛銀燭早朝催無端白面年
少出師書奏意酸哀五嶺天險無人分戍控弦一
夕潛來爲蕭牆變起鈎黨相角朝士鴛鴦 龍舸
夜動噴虺三兩扈從報國少涓埃三宮芒筑陽飄

泊桂管摧頽正銜枚爨爨一路遲迴六詔喜仗雄
才晉王再造惠國重興稍作屯難雲雷 又苦遭
兇逆爲讎羽翼作禍胚胎四引樓蘭鐵騎度金沙
血戰磨盤開寄命緬甸淒涼六軍潰裂魚服辭滇
海念龍饑誰與文君塊空嘔血諸葛時乖又命屯
玉步難恢恨兇渠逼脇上雲堆自重華逝蒼梧痛
哭血淚成灰

八聲甘州

恨蠻江亦復向東傾峽門小難收任牂牁萬里含
煙吐瘴全注交州往日水犀三萬戰血剩龍湫零
落艤艫影雨外沈浮 不忍崧臺憑弔更有無玉

壘試問沙鷗自黃龍朝去波湧失宸樓歎三宮春
隨蜃氣與沓潮變幻海西頭漁翁汝向金沙浦可
見膠舟

定風波

又離家兩月高要勞勞作客自苦落羽摧頽殘英
冷淡老大誰爲主典袞來碎琴去一代文章委塵
土無補令饑寒不免啾啾兒女 白頭未遇恁英
雄事業多衰暮喜萍花無恙陰山玉在磨得龍精
吐向龐公詠梁父誰識英高有文武須許鳳雛人
往南陽惟汝

買陂塘

買陂塘養多魚種養魚經好須讀魚花浮滿桃花
水魚戶一春爭漉新雨足放萬箇魚秧半是西江
族鯨三鰲六任嫩艸青青浮萍片片去果水梭腹
拖鼠好時用瑯玕嫋竹魚生飛亂紅玉誰持鱠
具來相訪兼爲荔支都熟蓴更綠蠶豉下羹魚飯
稻隨風俗量魚論斛是蛋客生涯鮫人事業水國
作湯沐

魚一各水梭菜粵
人作鱠各切魚生

又

買陂塘盡栽蓮種白蓮花比紅好貪伊多藕休傷
葉看作露房偏早花賣了把葉葉香羅包飯嘗新
稻芙蓉半槁又子乳茨菰筍肥菱白生滿接洲島

荷花蕩似向姑胥取到菱歌禁得多少鷓鴣灘
鴻休爭宿儘有五湖煙艸君莫笑舟上女褰裙踏
藕多嬌小蓮莖弄倒令水佩風裳三秋歷亂蒲柳
笑先老

桂枝香 歲庚午予年六十有一臘月之十日
恭遇慈大人人生辰適第五兒阿需

以是日舉
喜而有作

嘉平舉子正太母生辰壽筵張綺與父同年庚午
可能相似六旬有一生兒晚幸慈尊見集呱矣子
圍孫繞婆婆老福白頭多喜 望第五名齊驃騎
嘆同父諸兄豚犬而已五子陶公今足待教書史
五經分授傳家學更何時都會文字慰渠王母年

年春酒獻詩羅跪 婆婆老福宋太宗
稱張齊會月之語

憶舊遊 東湖感舊有作

記花中放舸竹下飛觴當日嬉遊未盡狂歌興苦
山公要去奏事螭頭暮烟已隱金谷餘得懊儂樓
歎粉黛難灰松杉易拱幾度高秋 風流更誰與
鎮日日彈棋夜夜藏鉤恨絕如泥慣令太常妻小
空白霜頭一聲雍子悲涕猿嘯助啾啾與別鵠離
鸞蘭閨一一同淚流 山公謂尹吏部也尹官至太
常而效其繼室姬妾皆守志

東風第一枝 壬申臘月廿九日立春
值內子季劉生辰賦贈

細切辛絲香堆翠縷謝家春滿纖手粉光新釅鮮
桃黛影乍描嫩柳歡開生日儘膝下鶯歌消受羨

又添一歲風光長媚畫堂尊母 今歲好釀多美酒來歲好膾多膩肉朔囊雖滿錢刀不買漢京少婦舖糜兒女一个个憐伊黃口念楚狂妻已冰清莫比女花還瘦

金菊對芙蓉

蒲衣納姬贈之

桃葉蠲愁柳枝銷恨不須萱樹蘭房正桐初乳子蕉早甜娘柳中更有同心物儘織手日日持漿休穿玉指未縫狄布先繡琴囊 憐惜小小娥光且緩教顧兔在月中央但看描五嶽衣渲三湘青絲角髻捐巾粉待入山同掃丹牀休師素女令伊情好長似探湯

換巢鸞鳳

蒲衣折梅歸餉贈之

多折瑤芳要持歸鏡側插滿鬟菊乳鶯初弄粉媚蝶早收香多情天肯念王昌故教換巢雌雄一雙教徐淑再嬌小復歸仙掌 歡暢春自享親鼓鳳

琶檀口催低唱石帚香詞玉田清曲都在鴟鷄絃上新製彈頭百千篇雪兒心慧能幽賞簾幃邊許

花翁每聆飛響

史梅溪詞天念王昌忒多情換巢

琵琶仙

蒲衣將我新詞譜入琵琶楔

天授王郎有誰識這是琵琶仙子彈出南宋新聲詞人任驅使紅豆好尊前麗曲又添得小紅能記笛已親教琴知自弄香閣多喜 笑連日情滿徐

妝爲梅萼紛紛點，鬢催我暗香幽咽。儘騷人風
致，須說與裁雲剪月。有箇儂俊句，相媚便與分入
檀槽。過雲天際。梅溪詞梅開半面情滿徐妝姬徐氏也

人月圓

秋蟾光滿雲中塞，人下玉鞍來。將軍嬌女，秦箏趙
瑟，清響含哀。歡娛一夢朝雲，易化秋雨，頻催無
因相逐。蘭魂蕙魄，同向泉臺。

又

秋蟾光滿珊瑚洲，水人駕綵舟。來劉家三妹，詩香賦
豔，閨閣仙才。糟糠淡薄，松枝未老，蕙草先摧。無
因魂返，珊瑚細步，燈下徘徊。

酷相思

慘淡秋缸花易謝，苦風入從窻罅。悄難睡，無人棋
共下。一點雨芭蕉打，兩點雨芭蕉打。繞砌寒螿
啼未罷，各自訴斷腸話。笑孤客蘭房長守寡。一點
淚胭脂，灑兩點淚胭脂，灑。

粉蝶兒

本意

繭出朱明翩翩鳳皇，孫子笑麻姑繡裙難似觸飛
絲穿落粉儘他春戲，更誰人逍遙漆園如爾。鶯
捎不去纏綿，一生花底與風流，綠毛丁髻共收香
到靜夜方開雙翅，怕嬌娥輕羅撲傷金翠。

臨江仙

折梅贈內子

梅妻本是梅家女白頭香雪相偎同心綠萼總重
臺鳳餐珠藥結仙胎 村號梅花誰不羨早從梅
嶺歸來南枝暖待北枝開百年春色忍相催有同
心梅

七娘子

愁來有路從烟草東風不把靡蕪掃絲短絲長將
愁縈繞萋萋一片先春老 紫駟驕向香泥倒綠
乾紅濕多行潦欲問蘿村無人知道茫茫不覺山
花好

少年遊

芭蕉

水蕉心老苦難開春作剪刀催油羅衫影冰綃裙
影蕩漾拂簾來 猩紅花藥層層卷愁拘束待輕

雷最怕秋聲冷含風雨且莫折苞胎

明月逐人來

秋夕與內子昭平夫人小酌

梅花開釀芙蓉相向秋蟾照翠樓冰亮夜寒多露
休把深杯讓早識卿卿雅量 難得鴛鴦白首情
逾酣暢雙簫起聲嫌輕颺月斜未睡猶倚簾櫳望
隱隱潮雞初唱

醉春風

乍上嬉春騎琵琶彈尚未邊人何處最風流記記
記花巷東頭雁門南口兩行妖麗 粉黛嫌香膩
冰雪天然致未過寒食已栽鞦戲戲休賽身輕
怕他飛燕有心憎爾

甘州令

柳條邊榆葉塞驚沙自卷鷗羽屋苦風吹散乍寒
天已淒慘夕陽偏晚白羊王紫駝女爲客作漢軍
兒飯飲餘杏酪弄深蘆管好貂帳乍生春暖正
玄冰凍黑水海州休返少卿廬子卿窖欲尋去馬
愁天遠

一痕沙

一向漢兒高臥早被闕氏笑破鼓滿踰長城騎飛
輕千里無人遮塞空把關山自賣何處四樓開
白登臺

淒涼犯

馬嘶不出邊風起聲含一片悲築白榆葉盡黃榆
又落總成蕭瑟長城已失但千里龍沙沒膝苦無
人綿羊空白燒取作朝食來往陰山下笑接闕
氏醉聽兜勒蔡姬在否剩胡笳曲傳多拍暫返雲
中待祠天還來作客恨邊長出塞入塞少羽翼

南鄉子

蓬鬆果

一樹蓬鬆身如井上兩梧桐雄樹生花雌結子鴛
鴦似不是多情爭有此

雙鴈兒

鳴笳疊鼓又黃昏散哨騎掩旗門曲吹公主嫁烏
孫教箏琶拭淚痕嬌嬈爭擁火紅盤泥上客賭

芳尊醉眠貂鼠帳房溫任新魂續舊魂

一落索

落花

消受春光無幾流鶯催爾無端開落太匆匆枉去
爭紅紫 苦被東皇驅使夢中相似行雲行雨總
無情教宋玉空悲淚

又

落花

多謝燕兒銜汝嘴粘紅雨紛紛青塚畫梁間棲宿
多香土 兩兩呢喃香語粉含脂吐巢成卽是玉
鉤斜魂片片憑爲主

琴調相思引

怕見春山不上樓煙含春恨雨含愁茫茫歸思不

共夕陽收

海燕多情偏易去邊鴻無主總難留

淒淒孤館苦住更何求

茶瓶兒

正悄寒時人獨臥雪吹亂紛紛風簸花細難成朵
錦衾空冷一片層冰裹 天遣多情真苦我更白
髮催人無那草草青春過酒慵花懶但掩窻兒坐

南鄉子

箇箇香囊中多萋葉疊鴛鴦鹹水檳榔那少汁唇
濕縱傳胭脂唇不入

又

注滿香螺白柳心小玉漿多飲取教卽長似醉花

中睡却笑檳榔無酒味

漁歌子

素馨紅素馨綠素馨紅綠看難足穿茉莉貫芙蓉
持作玲瓏花屋 旖旎香宜新浴離支膏滑慚非
玉捐麝片屏馘沉怕亂冰肌真馥

春光好

花似笑柳如愁總風流獨有傷春人不好雪盈頭
憎他乳燕鳴鳩一箇箇雙棲畫樓不肯拆開飛
教子趁風柔

江城子

灘頭乘雨放鷓鴣水生時一篙遲鯉魚三尺驚出

碧漣漪方便可能將尺素千里外寄相思

荷葉杯

鴈

又見邊鴻飛至歸未嘹唳一聲秋銜書不忍過高
樓愁摩愁愁摩愁

又

鴈

寫盡雙雙人字誰寄明歲鴈門迴教銜織錦到龍
堆來麼來來麼來

南鄉子

幽菊豔重陽心吐丹絲瓣卷黃一朶芙蓉相伴冷
禁霜露濕無眠愛夜長 梅萼又吹香夢裏偏宜
淺淡妝兒女小同山喜鵲雙雙月下啾嘈繞洞房

明月逐人來 新月

眉痕輕碧纖纖初畫微開鏡素娥無力兔兒何處
相顧無消息待滿雌雄方識誰見娟娟不向蘭
閨深憶蛾長短無人憐惜兩頭青黛應似春山滴
秋怕愁烟空積

木蘭花慢 飛雲樓作樓在端州公署後
巳丑皇帝南巡嘗駐蹕其上

繞闌干幾曲記龍馭此淹留剩鳩鵲恩暉芙蓉御
氣掩映飛樓颼颼冷飛亂葉似烏號哀痛慘高秋
多謝宮鴉太苦土花銜作珠丘梧州更有灞園
愁西望少松楸未委何年月玉魚自出金鴈人收
啾啾嶺猿箇箇抱冬青淚斷鬱江流寄語樵蘇躑

磨刀忍向銅溝 梧州有
皇帝興陵 端

象山言夕

四四



